

廿七 2

T 2455/17


金

卷四十

370

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE  
SEP 20 1932

ChL 2455.17



Harvard College Library Imaging Services <http://imaging.harvard.edu>

簡錄卷二百十七

明刑部員外郎仁

和弘齋印經邦學



皇清翰林院侍講學士四世孫遠平校閱

載記 金主之六

章宗皇帝父皇太子允恭母徒單氏大定八年世宗幸金蓮川  
 七月丙戌次冰井而生翼日幸東宮宴飲歡甚語太子曰祖宗  
 積慶以有今日皆社稷之福也又語司徒李石樞密紇石烈志  
 寧等曰朕子雖多皇后止有太子一人幸見嫡孫朕愛麻達葛  
 山地衍而氣清適皇孫生即小字麻達葛羣臣皆稱萬歲年十  
 一封金源郡王令習本朝語言文字及漢字經書以進士完顏  
 匡司經徐孝美等侍讀二十四年太子令奉表詣上京問安仍  
 請車駕還都世宗嘉其意賜勅書答諭明年萬春節復奉表朝

賀太子薨上遣滕王府長史再興御院通進阿里刺來護視十  
二月進封原王判大興府事入以國語謝世宗喜令宰臣諭旨  
朕嘗命諸王學本朝語惟汝甚習朕因其年幼且服制中未可  
付以職務亦須令學政事京輦之任欲令親見朝廷議論習知  
政事之體故也問其行事咸言見事甚明予奪皆不失當曹幽  
二王俱弗能及又聞有女直人訴事以女直語問之漢人訴事  
以漢語問之不忘本者聖人之道也以西夏小邦崇尚舊俗猶  
能保國數百年故凡事莫如一任其真也明年四月賜名璟五  
月拜右丞相方四月世宗問京尹與省事同乎對曰不同上笑  
曰京尹沿襲尚書省總大體所以不同自後屢試以事甚有可  
用之資諭令觀宮中輿地圖可以具知天下遠近既塞十一月  
詔立爲皇太孫稱謝於慶和殿復面諭爾年尚幼因父早亡朕  
得古禮嫡長孫爲後建立在朕保守在汝宜行正養德勿近邪

佞事朕必盡忠孝無失衆望則惟汝嘉次年三月辛亥上御大  
安殿授冊赦中外丁巳謁謝太廟及山陵始受百官牋賀詔選  
秉性純謹正直者以爲官屬勿用有權術之人上嘗語以爾讀  
先朝實錄太祖征麻產至泥淖馬不能進捨而步戰創業之艱  
如此可不思乎世宗不豫詔於慶和殿東廡攝政聽受五品以  
下官丁亥受攝政之寶崩日卽位柩前丙申大赦賜內外官單  
恩兩重三品以上一重免今歲租稅并自來懸欠係官等錢鰥  
寡孤獨人絹一匹米兩石甲辰以大理卿王元德等報哀于宋  
并二國二月癸亥始聽政追尊皇考爲皇帝母爲皇太后更所  
居宮曰隆慶甲子命學士院進呈漢唐便民事及當今急務戊  
辰詔宮籍監戶舊係睿宗及大行皇帝皇考之奴婢者悉放爲

良已巳敕御史臺自今監察令本臺辟舉任內不稱職亦從奏  
罷丁丑增定百官俸乙酉詔有司稽考典故許引用宋事是月  
宋主內禪立光宗三月壬辰朝于隆慶宮己酉立生辰爲天壽  
節五月丙午祔廟禮成大赦丁未地生白毛庚戌詔罷送宣錢  
今後諸護衛考滿賜官錢二千貫壬子敕收錄功臣子孫量材  
於局分承應戊午河溢曹州閏月丙寅觀稼於近郊壬申封乳  
母孫氏蕭國夫人姚氏莘國夫人癸未詔學士院自今誥詞並  
用四六乙酉詔諸有司凡承應人係將來受親民之職可命所  
屬諭使爲學其護衛符寶奉御奉職侍直近密當遇有德行學  
問之人爲之教授六月己丑朔從有司言律科舉人止知讀律  
不知教化之原必使通治論語孟子涵養器度遇府會試委經  
義試官出題別試與本科通定去留庚寅詔有司請親王到任

各給錢二十萬辛卯上納修起居注完顏烏者知登聞院孫鐸  
言罷圍獵拾遺馬升上儉德箴乙未詔曰朕初卽位憂勞萬民  
每念刑獄未平農桑未勉吏或不循法度以壞吾治朝廷遣使  
廉問事難周悉惟提刑勸農采訪之官自古有之今分九路專  
設是職並兼勸農采訪事屯田鎮防諸軍皆屬焉丁酉幸慶壽  
寺作盧溝石橋七月辛酉減民地稅十之一河東南北路十之  
二下田十之三辛巳初設經童科詔京府節鎮防禦州設學養  
士其長貳幕職內各以進士官提控其事仍具入銜八月戊子  
朔奉皇太后幸壽安宮壬辰初定品官子孫試補令史格及提  
刑司所掌三十二條設女直契丹漢兒知法各一人左司諫郭  
安民上疏勸上崇節儉去嗜欲廣學問凡三事丁酉如大房山  
戊戌謁奠諸陵己亥還都九月庚申詔增守山陵爲二十丁給

地十頃丙子獵于近郊張汝霖諫詔答曰卿能每事如此朕復何憂然時異事殊如能斟酌得中斯為當矣十月辛卯上以翰林關人從汝霖薦以鳳翔治中郝侯為之丙申冬獵已亥次羅山庚子次玉田辛丑沁與丹州進嘉禾丁亥次寶坻癸丑還宮十一月戊辰諭尚書省每歲令內外官各舉所知限以所舉之數違者悉坐蔽賢之罪仍依唐制凡五品以上官到任即舉自代並從提刑司採訪之已巳初制轉遞文字法辛巳詔有司今後諸處或有饑饉令總管節度使或提刑司先行賑貸或賑濟然後言上十二月丙戌朔詔罷鑄錢丁亥密州進白雉戊戌復置北京遠東運鹽使司能巡鹽使已亥賑寧化保德嵐州饑其荒移復業給復一年乙巳祭奠興陵壬子諭臺臣提刑司所舉劾多小過行則失大體不行恐有所沮其以此意諭之冬無雪

是歲遣使弔祭并賀即位生辰正且遼宋及二國並如故事

明昌元年正月丙辰朔改元以居喪不受朝賀甲子如太房山乙丑奠謁興裕二陵丙寅還都戊辰勅外路求世宗御書辛未如近畿春水二月甲辰還都三月乙巳擊毬於西苑百寮會觀乙亥初設應制及宏詞科壬午如壽安宮五月不雨乙卯祈于北郊及太廟戊午拜天于西苑射柳擊毬縱百姓觀壬戌祈雨于社稷甲子制省元及四舉終場人許該恩已巳祈雨于太廟庚午置知登聞鼓院事官一員勅設此院所以通達冤枉舊嘗鎖戶其令開之丙子雨未降望祭嶽鎮游瀆于北郊以祈六月甲辰勅僧道三年一試七月丁丑詔罷西北路蝦蟆山市場八月乙酉詔設常平倉壬辰幸玉泉山即日還宮癸巳罷諸府鎮流泉務選才幹之官為諸州刺史皆名見諭戒之戊戌集百官

議何以使民棄末務本以廣儲蓄戶部尚書鄧儼右丞移刺履  
叅政守貞徒單謚曰凡人之情見美則願若不節以制度將見  
奢侈無極費用過多民之貧乏殆由此致方今承平之際正宜  
講究此事為經久法上是其言以諭宰相丁未獵于近郊九月  
壬子朔天壽節以喪不受朝丙辰以廉能進擢北海縣令張翺  
等十八人官壬戌如秋山十月丁亥還宮丁未獵于近郊十一  
月乙卯詔以惑眾亂民禁罷全真及五行毘盧丙子冬獵己卯  
次雄州判真定府事吳王永成判定武軍節度隋王永升來朝  
十二月壬午免獵地今年稅丁亥次饒陽丁酉還都二年正  
月庚戌朔喪未除不受朝甲寅始許宮中稱聖主乙卯皇太后  
不豫日往侍疾丙夜乃還辛酉崩丙寅以左副都點檢面等報  
哀于宋高麗夏各遣使來弔祭甲戌百官表請聽政不許戊寅

詔賜陘括里部羊三萬口重幣五百端絹二千匹以振其乏二  
月壬辰上始視朝勅以科目近多得人因尚書省奏增取進士  
今後有司會試程文但合格者取之母限人數丙午初設王傅  
府尉官三月癸亥敕有司但州府名犯前代國號者不得以封  
臣下詔改遼為恒州宋為汴州秦為鎬州晉為并州漢為益州  
梁為邵州齊為彭州殷為譙州唐為絳州吳為鄂州蜀為夔州  
陳為宛州隋為涇州虞為澤州四月乙酉祔葬裕陵戊子制諸  
部內災傷主司應言而不言及妄言者罪庚寅禁民庶不得服  
純黃銀褐色婦人勿禁辛卯幸壽安宮諫官張暉等疏止其行  
不允癸巳諭有司自今女直字直譯為澠字罷國史院專寫契  
丹字者戊戌增太學博士助教員己亥學士院新進唐杜甫韓  
愈劉禹錫杜牧賈島王建宋王禹偁歐陽修王安石蘇軾張耒

秦觀等集二十六部庚子改壽安宮名萬寧壬寅車駕臨幸五月庚戌敕自今四日一奏事仍免朝戊辰詔以終場舉人克御史臺令史六月癸巳禁稱本朝人及本朝言語爲蕃違者杖之七月己未觀稼于近郊八月己亥勅山東河北關食等處許納粟補官九月甲寅如大房山乙卯謁奠裕陵丙辰還都庚申如秋山十月己丑還都壬寅河北山東旱減死罪一等徒以下釋之十一月戊午夏人殺邊將阿魯帶三年正月乙巳朔皇太后喪不受朝丙辰小祥從尚書省議依元年世宗忌辰例諸王陪位服慙素去金玉之飾百官不視事仍禁音樂屠宰壬戌如春水二月壬辰還京辛丑詔追復田穀等官爵三月辛巳初設左右衛副將軍癸未盧溝石橋成幸熙春園丁亥如萬寧宮上嘗問忻州陳毅上書其一極論守令之弊上謂方今正欲知之

命宰臣面問所以救之之道如毅所言隨處有司不能奉行條制爲人傭僱尚須出力况食國家之祿而乃如是得無虧臣子之行乎其令檢會前後所降條理舉行之丁酉命有司祈雨望祀嶽鎮海瀆于北郊四月甲辰旱災祈雨于社稷丙辰下詔責躬丁卯上親望祭如前儀戊辰遣中丞吳鼎樞等會決中都冤獄外路委提刑司處決左丞守貞等上表乞解職不允叅政衡萬公入謝上令速行前詔能不急之役省無名之費議冗官決滯獄四事五月甲戌雨戊寅出宮女百八十三人尚書省奏山東河北饑已委宣差所至安撫賑濟復遣右三部司正范文淵往視之戊子雨足百官入賀己丑禱謝諸神六月癸卯定諸路提刑司條制宰臣請罷之上曰若論官止三十餘員猶患不得其人州郡三百餘處其能盡得人乎弗許甲寅久雨復命有司

祈晴辛酉詔定內外所司公事故作疑申呈罪罰格乙丑有司  
言河州災傷民乏食詔免租稅諭戶部預給百官冬季俸令就  
倉以時直糶與貧民秋成各以其貲糶之以便上下其承應人  
不願者聽七月戊寅敕尚書省饑民如至遼東恐遽難得食必  
有饑死者其令散糧官計口分散仍隨所欲居止給以文書命  
富者出粟限以兩月其粟克秋稅之數已卯祁州刺史頓長壽  
安武軍節度副使胡刺坐賑濟不及四縣各杖五十癸未詔增  
北邊軍千二百人分置諸堡八月癸卯上以軍民不和吏員姦  
弊詔四品以下六品以上咸集尚書省問以朝政得失及民間  
利害各述所見以聞辛酉獵于近郊乙丑上語宰臣朕欲任官  
令久于其事使中材之人久于其職事既熟終亦得力若今日  
作禮官明日司錢穀雖間有異材事亦難辨爾等當悉朕意又

問太常卿張曄古有三恪今何無之令具典故以聞九月庚午  
朔諭尚書省去歲被災傷處所闕租稅及借貸錢粟若便徵之  
恐貧民未蘇俟豐收日以分數察徵可也又言隨路提刑司舊  
止察老病不任職及不堪親民者改除他路若他路提刑覆察  
得實勿復注親民之職卿等共議行之已卯如秋山免圍場經  
過人戶今歲夏秋租稅之半曾當差役者復一年十月壬寅還  
京丙午敕御史臺提刑司自今保中廉能官勿復有乞升品語  
應保舉官及試中書判者委官覆察言行相副量與陞除隨朝  
及六品以上各隨所長用之甲寅敕置常平倉處並令州府提  
刑縣官兼管勾其事以所糶多寡約量陞降定為永制戊午諭  
尚書省訪求博物多知之士已巳獵于近郊十一月丙子詔臣  
庶名犯古帝王而姓復同者禁之周公孔子之名亦令回避戊



寅升相州爲彰德府十二月辛亥諭有司祈雪癸亥獵于近郊  
丙辰有赤氣見于北方丁巳敕華州下邽縣置武定鎮倉京兆  
櫟陽縣置粟邑鎮倉許州舞陽縣置北舞渡倉各設倉草都監  
一人縣官兼領之 四年正月己巳朔不受朝賀癸未上責宰  
臣朕既嘗語卿百官當使久於其職如蘇德秀方任大興府推  
官復改戶曹今又除禮部主事人才豈能兼之以後不可輕易  
又言凡稱政有異迹者謂其斷事有軼才也若止清廉此乃本  
分以貪汙者多故顯其異耳宰臣對曰今所察舉皆先才後德  
巧猾之徒雖有臧污未見汰去猶爲能吏此廉恥所以喪也若  
論所司察舉官吏必審真僞使有才無行者不能覬覦非道求  
進者加之糾劾則奔競之俗息而廉恥可興矣上嘉納之癸巳  
諭黜檢司行官外地及圍獵之處悉與民耕雖禁地聽民持農

器出入丙申東京路副使王勝進鷹遺諭之曰汝職非輕民間  
利害官吏邪正畧不具聞而乃以鷹進此豈汝所職耶後毋復  
爾二月戊戌朔如春水始以春秋二仲月上戊日祭社稷及日  
月風雨雷師常祀癸丑獵于姚村浞癸亥還京三月戊辰朔誠  
諭諸路提刑司朕特設此官本欲安民于今五年劾猶未著多  
由不識本體職事徒事細碎以致州縣例皆畏縮不敢行事邇  
者山東民饑朕使賑濟此卿等不職故至於此既往之失其思  
悛改甲戌定民習角觥槍棒罪甲申幸香山永安寺及玉泉山  
甲午敕自今御史臺奏事並令修注回避四月丁酉朔幸興陵  
崇妃第始命舉樂自己亥至癸卯丞相清臣率百官及耆艾學  
官劉璣亦率大學諸生趙楷等詣紫宸門三表請上尊號上以  
比年五穀不登百姓流離正當戒懼修身之日豈得虛受榮名

不許戊申禘于太廟庚戌如萬寧宮丁巳赦女直進士及第後  
仍試以騎射中選者升擢之乙丑減尚廩食穀馬五月丙寅朔  
曹王永升率諸王請上尊號亦不許甲戌久雨觀稼于近郊辛  
巳徧諭諸路月具雨澤田禾分數以聞癸未禁命賑河北諸路  
及河州被水饑民六月丙辰以晴致祭嶽鎮海濱八月己亥歲  
星太白晝見庚子大赦甲辰還京辛亥國史院進世宗實錄上  
服袍帶御仁政殿降座立受之九月甲子朔天壽節始御大安  
殿受親王百官及宋高麗夏使朝賀戊辰敕尚書省卽位以後  
上庶言事關係國家邊防大利害已嘗施行者可特補一官有  
益於官民量給以賞庚午如山陵次奉先縣辛未拜天于縣西  
壬申致奠諸陵癸酉如秋山十一月壬午雨木冰丙戌詔諸職  
官以賊污不職被罪以廉能獲升者隨路京府州縣列其姓名

揭之公署以示勸懲十二月甲午朔夏國嗣子李純佑遣使奉  
故王仁孝遺表以進仍來訃告以西上閣門使大畧等爲救祭  
慰問使甲寅冊長白山神爲開天弘聖帝丙辰獵于近郊是歲  
大有年邢洛深冀及河北十六譟克之地野蠶成繭五年正  
月乙丑昭容李氏進位淑妃己巳初用唐宋典禮皇后忌辰皆  
廢務尚書省進區冊法詔相地宜務從民便乙亥詔封始製女  
直字葉魯谷神立廟北京納里渾莊歲時致祭官其子孫以主  
奠獻辛巳遣國子祭酒劉璣冊李純佑爲夏國王丁亥幸城南  
別宮丁酉初定長吏勸課能否賞罰格從尚書省奏皇太后祥  
除已久易所居隆慶宮爲東宮慈訓殿爲承華殿戊戌詔購求  
崇文總目內所闕書籍癸丑命宣徽使移剌敏戶部主事赤蓋  
實理哥相視北邊營屯經畫長久之計三月壬申初定限錢禁

戊子置弘文院譯寫經書四月壬辰朔幸北苑壬子特賜翰林待制溫迪罕迪翰林學士承旨中奉大夫乙卯幸景明宮五月庚午次烏十撒八戊子桓撫二州旱遣使禱于縉山六月壬辰郊冰井已亥出獵登胡土白山酌酒再拜曹王永升以下進酒丙午拜天曲赦西北路已未如查沙秋山七月戊辰獵于豁赤火一發貫雙鹿賜扈從官有差辛巳次魯溫合失不乙酉次冰井丙戌天壽節宴樞光殿凡從官及承應人遇單恩遷秩者並受宣救於殿前時久雨初霽有龍曳尾于雲間上舉御羹中有髮戒左右毋言八月辛亥還京壬子河決陽武故隄灌封丘而東丁巳賜從幸山後親軍銀絹各有差九月壬申宰遣使來告孝宗之喪戊寅遣尼龐古鑑等爲弔祭使救尚書省集百官議備邊事壬午特推恩東宮舊人司經王伯溫等八人官有差甲

申命上京等九路并諸抹及乳等處選軍三萬俟來春調發仍命諸路并北阻犍以六年夏會兵臨潢十月庚寅宋遣使獻遺留物壬寅戶部員外郎何格賑河決被災人戶壬子尚書省奏升提刑司所察廉官南皮縣令史肅以下十有二人上知其中大興主簿蒙括蠻都其人澆浮常才命再察之間月戊午朔宋遣使來報卽位甲戌以河南北提刑使王啓等爲賀宋主卽位使乙亥獵于近郊丙戌以翰林待制奧屯忠孝權戶部侍郎太府少監溫昉權工部侍郎行戶工部事修治河防免被災民戶今年秋稅十二月癸未救尚書省自今獻靈芝嘉禾者賞之六年正月辛卯詔給天水郡公家屬田宅壬辰如春水庚戌罷陝西括地辛酉諭胥持國河上役夫聚居恐生疾疫可廩醫護視之乙卯次御林二月丁巳朔敕有司行宮側及獵所有農者

勿禁已未始祭高禩庚午還宮丁丑京師地震大雨雹晝晦震  
應天門右鷓尾癸未宋遣使來報謝三月甲午以翰林直學士  
李木魯子元兼右司諫監察御史田仲禮爲左拾遺翰林修撰  
僕散訛可兼右拾遺諭之曰國家設置諫官非取虛名蓋責實  
效庶幾有所裨益卿等皆朝廷選擢置之諫職如國家利害官  
吏邪正極言無隱近路鐸左遷本以他罪卿等勿以被責遂畏  
縮不言其悉心戮力毋得緘默丙申如萬寧宮戊戌括羣牧所  
三招討司猛安謀克隨紂及迭刺唐古部諸抹西京太原官民  
馳五千克北邊糧運惟民以馳載爲業者勿括又以銀五十萬  
兩錢二十三萬貫以備支給銀五萬兩金盃二千八百兩金牌  
百兩銀盃八千兩絹五萬匹雜綵千端衣四百四十六襲以備  
賞勞庚子郡舉才行之士翟介然以下三人賜進士及第李貞

固以下十五人同進士出身四月丙子幸玉泉山戊寅修河工  
畢進胥持國官二階與屯忠孝以下三十六人各一階獲嘉令  
王維翰以下五十六人各賜銀幣有差五月丙戌命減萬寧宮  
陳設九十四所辛卯以出師遣禮部尚書張暉告于廟社乙未  
鎬王永中以罪賜死罪諫官賈守謙僕散訛可奏對不實罷之  
田仲禮并中丞孫卽康右補闕蒙括胡刺各罰金二十斤乙巳  
詔諸路猛安謀克農隙講武本路提刑司察其惰者罰之六月  
丙寅以久雨禱七月丙申幸曹王永升第甲辰始定文武官六  
貫石以上承應人并及廢者若在籍儒生章服制八月己巳以  
溫敦伯英言命禮部令學官講經乙亥敕宮中承應人出職後  
三年內犯賊罪者元舉官連坐不在去官之限著爲令辛巳木  
波進馬九月甲申冊靜寧山神爲鎮安公忽土白山神爲瑞聖

弘簡錄 卷二百十七  
公辛卯如秋山十月丙辰還京十一月壬寅初定猛安謀克鎮邊後放免者授官格禁射糧軍應役但成隊伍不得持兵器乙巳以唐括貢移刺仲方張暉等二十三人克計議官凡軍事得預議所進奏帖可直言利害無用浮詞戊申初定縣官增水田陞除制十二月右丞相襄率駙馬都尉僕散揆等進軍大鹽濼分兵攻取諸營乙卯詔招撫北邊軍民乙亥加五鎮四瀆王爵庚辰幸後園閱軍器

承安元年正月甲申大鹽濼羣牧使移刺覲等爲廣吉刺部兵所敗死之丁亥國學齋長張守愚上平邊議三篇特授本學教授仍以其議付史館二月初造虎符發兵甲子命有司祀高禩如新儀丁卯右相襄左丞衡至自軍前己巳復命還軍辛未幸都南行宮春水甲戌還宮三月丁酉如萬寧宮不雨遣官望祭

嶽鎮海瀆于北郊癸卯救人命至重不可不慎自今刑獄雖已奏行其間恐有疑枉其再議以聞甲辰遣參政尼龐古鑑祈雨于社稷丁未復遣使就祈于東嶽四月辛亥命右丞胥持國再禱于太廟壬子遣使審決冤獄京城禁繳扇戊午初行區種法民十五以上六十以下有土田者丁種一畝時久不雨命大臣仍分禱社稷太廟北嶽北郊甲戌宰相奏趙承元請追上孝懿皇太后冊寶然後行謚冊禮禮官執奏已詔示中外無追冊禮罷之五月庚辰朔觀稼于近郊因闕區田乙酉以久旱徙市庚寅詔復市如常庚子雨足六月甲寅百姓艱食詔出倉粟十萬石減價以糶之乙丑平晉縣民利通家蠶自成綿段長七尺一寸五分濶四尺九寸詔賜絹十匹庚午幸環秀亭觀稼七月庚辰御紫宸殿受諸王宰執百官賀各賜以酒仍以酒萬尊置通

循賜民縱飲乙酉敕今後高麗夏使入見敷奏令新設各國通  
事具公服與閣門使上殿監聽戊子命有司收瘞西北路陣亡  
骸骨八月癸丑幸玉泉山甲子以郊祀日期詔中外戊辰還京  
九月丁丑朔天壽節幸天長觀祈禱壬午賜左丞相襄酒百尊  
癸未都人進酒詔以三千一百瓶賜北邊軍吏丙辰祫享于太  
廟十一月庚寅特滿郡牧契丹隨鎖德壽反泰州軍擊敗之丁  
酉朝享于太廟戊戌南郊大赦改元己亥曹王永升率親王百  
官賀癸卯命有司祈雪仍遣官祈于東嶽十二月己酉遣提點  
太醫近侍局使李仁惠勞賜北邊將士授官者萬一千人授賞  
者幾二萬人凡用銀二十萬兩絹五萬匹錢三十二萬貫 二  
年春正月丁亥如安州春水丁酉還京辛丑宋主遣使告其母  
后喪三月壬午命戶部侍郎溫昉佩金符行六部尚書於撫州

庚寅幸西園閱軍器丁酉參知政事裔代左丞相襄行省于北  
京四月甲寅如萬寧宮丙辰命有司祈雨望祭嶽鎮海濱于北  
郊甲子祈雨于社稷從尚書省奏比歲北邊調度頗多請降僧  
道空名度牒紫褐師德號以助軍儲癸酉親王宣敕始用女直  
字五月甲戌朔諭宰臣比以軍須隨路賦調司縣不度緩急促  
期徵歛使民費及數倍胥吏又乘之以侵暴其令提刑司究察  
之丙子再諭官吏今綱紀不立官吏施慢遷延苟簡習以成弊  
職官多以吉善求名計得自安國家何賴焉至於徇情賣法省  
部令史尤甚尚書省其戒諭之庚辰升撫州為鎮寧軍辛巳雨  
足報祭諸神己丑皇子生封為壽王未踰年薨六月丙午雨雹  
庚戌詔罷瑤光殿工作甲寅置全州盤安軍節度使置安豐縣  
閏月甲午出西橫門觀稼七月壬寅朔幸天長觀建普天大醮

七日禁屠宰無奏刑百司權停決罰己未命西上閣門使劉頗  
賜參知政事裔宴于行省戊辰天壽節御紫宸殿受朝八月辛  
巳以邊事未寧詔集六品以上官於尚書省問攻守之計議者  
八十四人言攻者五守者四十六且攻且守者三十三名對睿  
思殿論難久之癸未還京九月壬寅遣官分詣上東西北四京  
咸平臨潢等路招募漢軍不足則簽補之乙巳夏使賀天壽節  
朝辭詔答許復保安蘭州權塲乙丑始置軍器監掌治戎器班  
少府監下設甲坊利器二署隸焉十月庚午朔初設講議所官  
十員共議錢穀以中都路轉運使孫鐸戶部侍郎高汝礪等爲  
之壬午尚書省行下諸路推排人戶物力甲午大雪賜普濟院  
米千石爲粥以食貧民十一月甲辰冬至有事于南郊乙巳以  
薪貴敕圍場地內無禁樵採壬子諭尚書省猛安謀克既不隸

提刑司宜令監察御史察其減否甲子諭宰臣朕居九重民間  
難以徧知令採利害以聞十二月己巳朔敕御史臺糾察詔佞  
趨走有實跡者己卯始鑄承安寶貨癸未遣戶部侍郎上官踰  
體究西京逃亡勸率沿邊軍民耕種戶部郎中李敬義規措臨  
潢等路農務乙酉諭宰臣今後水潦旱蝗盜賊竊發命提刑司  
預爲規畫戊子諭西南路將士三年正月癸卯諭有司凡接  
伴宋夏使者毋以語言相勝務存大體奉使者亦必得人乃可  
乙卯罷講議所丙辰如城南春水改都南行宮名建春丁巳併  
上京東京兩路提刑使副爲一俱兼安撫使副專掌教習武事  
毋令改其本俗甲子還宮乙丑宋遣使告祖母喪以武衛軍都  
指揮使烏林答天益等爲弔祭使二月己巳朔幸建春宮辛巳  
諭宰臣自今內外官闕有才能可任者雖資歷未及亦俱以聞

雖親故毋有所避甲申還京丙戌斜出內附三月壬寅始權醋  
甲寅如萬寧宮丙寅高麗國王皓老疾令母弟暉權國事遣使  
奉表來告遣侍御史孫俱往宣問四月丙申諭御史臺曰隨朝  
大小官雖有才能率多苟簡朕甚惡之其察舉以聞提刑司所  
察廉能汙濫官皆當殿奏餘事可轉以聞五月壬寅射柳擊毬  
縱百姓觀七月丙午幸香山已酉如萬寧宮甲寅還宮八月辛  
未獵于近郊癸酉獵于香山庚辰以護衛石和尚爲押軍萬戶  
率親軍八百人武衛軍千六百人戌西北路癸未宋遣使來報  
謝九月乙巳獵于近郊戊午木波進馬十月癸未行樞密院言  
斜出等請開權場於轄里裊從之丁亥定官民存留見錢之數  
設回易務更立行用鈔法十一月辛亥以邊事定詔減中外死  
罪徒以下釋之甲寅冬獵十二月甲子朔大風罷獵凍死者五

百餘人已巳還都丙戌高麗權國事王暉遣使奉表來告 四  
年二月乙丑如建春宮春水己巳還宮庚午御宣華門觀迎佛  
會壬申諭有司自三月一日爲始每旬三品至五品官各一人  
轉對六品亦以次對臺諫勿與有應奏事與轉對官相見無面  
對者聽其上章庚辰上諭點檢司自蒲河至長河及細河以東  
朕常所經行官爲和買其地令百姓耕之仍免其租稅三月己  
亥遣使冊王暉爲高麗國王辛丑戶部尚書孫鐸郎中李仲畧  
國子祭酒趙忱始轉對香閣乙卯從宰臣議罷諸路提點刑獄  
改爲按察使司戊午雨雹四月戊辰如萬寧宮五月壬辰朔旱  
下詔責躬求直言避殿減膳審理冤獄戊戌命有司望祭嶽瀆  
禱雨己亥應奉翰林文字陳載上言四事一邊民苦于剋掠二  
農民困于軍須三審決冤滯一切從寬苟縱有罪四行省官員



例獲厚賞而沿邊司縣曾不霑及此于和氣致旱災之所由也  
上是之戊申京畿雨上諭宰臣諸路旱或因闕政今惟大興宛  
平兩縣不雨得非守令之過司空襄等上表待罪上以罪已答  
之令各還職庚戌尚書省奏上更定給發虎符制著于令壬子  
祈雨于太廟乙卯更定軍功賞格六月丁卯雨復御殿加膳甲  
戌雨足命有司報謝丁丑從右補闕楊庭秀言自轉對官外復  
令隨朝八品以上外路五品以上及出使外路有時政得失民  
間利病可言者並許移檢院以聞癸未奉職醜和尚進淨漏水  
稱影儀簡儀圖命有司依式造之丁亥定宮中親戚非公事傳  
達語言轉遞諸物及書簡出入者罪之七月甲辰更定尚藥儀  
鸞局學者格丙辰久雨令大興府祈晴八月己巳獵于近郊壬  
申獵于香山甲戌以皇嗣未立命有司祈于太廟庚辰還宮九

月庚寅朔天壽節赦宣徽院官凡致仕宰執悉名與宴己亥如  
薊州秋山十月丙寅還京甲申初置審官院乙未赦京府州縣  
設普濟院每歲十月至來年四月設粥以食貧民庚戌命有司  
祈雪十二月李氏進封元妃辛酉更定考試隨朝檢知法條格  
從右補闕楊庭秀請類集太祖太宗世宗三朝聖訓以時觀覽  
仍詔增熙宗爲四朝癸未增設國史院女直漢人同修史各一  
人五年正月乙未從尚書省言更定科舉法會試取策論記  
賦經義不得過六百入合格者不及其數則闕之丙申如春水  
諭點檢司車駕所至仍令百姓市易二月辛未還宮辛巳詔應  
奉翰林文字溫廸罕天興與其兄直學士思齊同僚定撰制誥  
文字不須迴避仍爲定制丁未上是楊庭秀言令及第左右官  
一人應入史事者編次日曆或一月或一季封送史院仍令送

著作局潤色付之三月庚申大睦親府進重修玉牒定皇族收  
養異姓男爲子者徒三年姓同者減二等立嫡違法者徒一年  
壬戌命有司禱雨癸亥兩尚書孫鐸大理卿完顏撒剌國子司  
業蒙括仁本台對便殿丙寅如萬寧宮戊辰定本國婚聘禮居  
祖父母父母喪并妻亡服內婚娶聽離制丙子卜論尚書省宰  
相豈可止徇人情要當重惜名爵所擬商州同知蒲察西京爲  
濟南府判官此人不堪朕常記之止與七品足矣辛巳改山東  
東路舊皇城猛安名曰合里歌阿隣四月丙午尚書省進律義  
五月乙卯朔雨足遣使報祭丁巳定策論進士及承蔭人試弓  
箭格敕重五拜天服公裳者拜禮仍舊諸使服者並用女直拜  
已未敕諸路按察司糾察親民官不許以大杖箠人庚辰地震  
詔定進納官有犯決斷法六月乙巳遣有司祈晴望祭嶽瀆七

乃乙卯朔以晴遣官報謝諸神八月壬辰幸香山乙未還宮庚  
申更定鎮防軍犯徒配役法九月癸亥如秋山十月庚寅還京  
庚子宋遣使來告孝宗哀以工部尚書烏古論誼等爲弔祭使  
辛丑集百官于尚書省問間者亢旱近則久陰凡政有錯謬其  
各以所見對十一月乙卯以國史院編修呂卿雲爲左補闕兼  
應奉翰林文字審官院駁以資淺上諭之曰明昌間卿雲嘗上  
書言宮掖事辭甚切直皆他人不能言者卿輩蓋不知也臣下  
言事不令外人知乃是謹密正當顯用卿宜悉之己巳宋復遣  
使來告光宗哀以河南路統軍使克等爲弔祭使十二月癸未  
朔詔改明年元

泰和元年正月壬戌宋遣使獻先帝遺留物己巳從太府少監  
孫復上言方今入仕者三萬七千餘員而門廕補敘居三之二

諸司待闕動至累年蓋以補糶糶多流品混淆本末相舛至於  
進納之人既無勞績又非科第而亦瘡及子孫無所分別欲流  
之清必澄其源乃更定瘡敘法而頒行之尚書省奏今杖式輕  
細民不知畏請用大杖詔頒銅杖式不許過五分庚午如長春  
宮春水二月丁未還京三月壬申幸天長觀癸酉如萬寧宮乙  
亥宋遣使來報謝四月甲辰詔諭契丹人戶累經簽軍立功者  
官賞恩例與女直人同仍許養馬爲吏五月甲寅擊毬于臨武  
殿令都民縱觀壬戌幸玉泉山六月己卯幸香山辛卯祈雨己  
亥論尚書省申明舊制舉行風俗奢僭之禁凡猛安謀克每戶  
田四十畝鬻者有禁樹桑一畝毀者有刑按察司以時勸督但  
有汙萊闕乏并坐所臨長吏有故慢者量決罰之仍減牛頭稅  
三之一乙巳詔推排西北京遼東三路人戶物力許諸科徵鋪

馬黃河夫軍須等錢折納銀一半願納錢鈔者聽丁未詔有司  
修蓮花漏七月辛酉禁放良人不得應諸科舉子孫不在禁限  
乙丑更定右選注縣令丞簿格九月戊申朔更定贍學養士法  
生員給民佃官田人六十畝歲支粟三十石國子生人百八畝  
歲給以所入官爲掌其數甲寅如秋山丙子還宮十月乙酉給  
享于太廟壬辰御史臺奏在制按察司官比任終遣官考覈然  
後尚書省命官覆察之今監察御史添設員多宜分四路巡行  
每路女直漢人各一同往從之壬寅敕有司購遺書宜償其價  
以廣搜訪藏書之家有珍惜不願送官者官爲謄寫畢復還之  
仍量給其直之半十一月辛亥敕尚書凡役衆勞民之事慎勿  
輕行丁巳諭工部比聞懷州有橙結實官吏檢視擾民今復進  
柑必致重擾其誠所司遇有則進無則已十二月辛巳敕改原

廟春秋祭祀稱朝獻丁酉司空襄等進新定律令敕條格式五  
 十二卷詔頒行之 二年正月乙卯始朝獻于衍慶宮每歲五  
不庚申幸芳苑觀燈甲戌如建春宮二月戊戌初置內侍寄祿  
 官乙巳還宮三月甲寅初置宮苑司都同監各一人四月庚辰  
 幸昇國長公主第問疾癸卯如萬寧宮命有司祈雨五月戊申  
 如泰和宮改名曰慶寧長樂川曰雲龍辛亥初薦新于太廟壬  
 戌諭有司金井捺鉢朕留不過二三日所止一涼厦足矣若加  
 修治徒費人力其藩籬不急之處用圍幕可也己巳敕御史臺  
 京師拜廟及巡幸所過州縣止令灑掃不得以黃土覆道違者  
 糾之六月辛卯諭尚書省諸路禾稼及雨多寡令州以聞七月  
 辛亥有司奏還宮日請用黃麾杖不許八月丙申鳳凰見于磁  
 州武安縣鼓山石聖臺詔中外丁酉皇子生九月甲寅以拱衛

直都指揮使完顏瑋等為賀宋生日使戒以兩國和好汝不宜  
 爭細故傷大體十月丙戌獵于近郊十一月甲辰頒詔中外更  
 定國運為土德臘用辰十二月癸酉皇子晬日放僧道戒牒三  
 于戊寅冬獵丁酉還都冬無雪 三年正月癸酉遣官祈雪于  
 北嶽庚辰如建春宮二月癸丑還宮三月庚辰如萬寧宮甲午  
 如玉泉山四月乙巳禘于太廟丁巳敕有司祈雨頒土龍法五  
 月壬午拜天射柳上三發三中四品以上官侍宴魚藻殿以天  
 氣方暑命兵士甲者釋之辛卯皇子葛王薨丙申作太極宮六  
 月壬寅詔選聰明方正之士修起居注詰黠檢司諸親軍所設  
 教授其法何如及受業人通大義者有幾各具以聞壬戌遣官  
 行視中都田禾雨澤分數七月庚辰獵于近郊丁亥上諭宰臣  
 凡奏事朕欲徐思或如已者若除授事可俟三五日再奏餘並

二十日奏之八月庚申命編修官左容克宮教賜銀幣九月壬辰詔定千戶謀克受隨處捕盜官公移盜急不卽以衆應之者罪有差十月庚申完顏匡等進世宗實錄上降座立受之壬戌奉御完顏阿魯帶使宋還言韓侂胄市馬屬兵將謀北侵上怒以爲生事答之五十出爲彰德府判未幾果實仍擢安國軍節度副使丁卯諭尚書省自今士庶陳言可悉令詣闕量與食直給居官舍其言切直及繫利害重者並三日內聞奏十一月丁丑冬獵獲兔以薦山陵十二月己酉賜天長觀額爲太極宮辛亥詔諸親王公主每歲寒食十月朔聽朝謁興裕二陵忌辰亦如之癸丑詔遣監察御史分按諸路必女直與漢人偕戊午敕行宮名曰光春其朝殿曰蘭臯寢殿曰輝寧 四年正月辛未如光春宮春水壬申陰霧水冰辛卯高麗嗣子諶遣使來告其

父暉哀二月乙未朔還宮丁酉山東河北旱詔祈雨東北二嶽庚戌親祀三皇五帝四王從尚書省奏前代帝王合致祭者若夏太康殷太甲太戊武丁周成王康王宣王漢高祖文景武宣光武明帝章帝唐高祖文皇一十七君併遣官祭之三月丁卯日昏無光大風毀宣陽門鴟尾癸酉命大興府祈雨戊寅幸太極宮乙酉親禱北郊并社稷太廟丁亥如萬寧宮遼陽府判官斜卯劉家以上書論列朝臣削官罷之四月庚子增定關防姦細格丙午定衣服制甲寅久旱下詔責躬求言避殿減膳徹樂省御廐馬免州縣徭役及今年夏稅遣使審繫囚理冤獄乙卯宰臣上表待罪詔答朕德有愆上天示異卿等各趨乃職思副朕懷戊午遣西上閣門使張偁等爲高麗敕祭使東上閣門使石懋等爲慰問并起復橫賜使壬戌萬寧宮端門災五月乙丑

有司請雩祀詔三禱嶽瀆社稷宗廟不雨乃行之甲戌雨乙亥  
百官表賀復御殿如常儀乙酉報謝諸神六月乙巳始祭中霽  
壬子司天臺長行張翼進天象傳七月庚午幸望京甸壬申如  
萬寧宮甲戌罷限錢法八月庚子詔完顏綱喬宇宋元吉等編  
類陳言文字其言涉宮庭若大臣省臺六部各以類從凡二千  
卷尚書省奏河南府盧顯達汝州王大材所陳言涉不遜情理  
切害請論其罪從之丁巳幸太極宮弛圍塲遠地禁縱民耕捕  
樵採減教坊長行文繡署女工各五十人出宮女百八十人九  
月丙寅如薊州秋山十月甲午定私讎法癸卯還宮十一月癸  
酉雨木冰凡三日十二月己丑朔新平等縣蚘蚘蟲生辛丑敕  
陝西河南饑民所鬻男女官爲贖之五年正月己未朔大雪  
乙丑幸太極宮丁卯如光春宮春水乙亥詔有司自太和三年

郡縣三經行幸民嘗供億者賜今年租稅之半丁丑次霸州調  
山東河北軍夫改治漕渠二月己丑朔諭各路按察司限於近  
制各務因循莫思舉刺郡縣以貪黷相尚莫能畏戢自今若糾  
察得實民無冤滯能使一路鎮靜者爲稱職其或煩紊使民不  
得伸愬者是爲曠廢己亥如建春宮三月乙丑宋兵入秦川界  
辛巳又入鞏州來遠鎮唐州謀報韓侂胄屯兵鄆岳將謀北侵  
四月癸巳命樞密院移文宋人依誓約撤新兵毋縱入境五月  
甲子拜僕散揆河南宣撫使籍諸道兵以備宋甲申宋兵破漣  
水縣六月戊子復之甲寅召諸大臣問備宋之策皆以設備養  
惡爲言上以南北和好四十餘載民不知兵不忍先發七月戊  
辰如錦屏山壬申朝獻于衍慶宮乙亥宣撫司奏定姦細罪賞  
法宋將郭倪與濠州守臣田俊邁誘虹縣民蘇貴等爲間利其

賄賂反爲遊說及聞行臺之建皆畏讐不敢進八月辛卯從揆請罷宣撫司九月戊子西北方黑雲間有赤氣如火色次及西南正南東南方皆亦有白氣貫其中至中夜赤氣滿天四更乃散戎戍宋兵三百攻北陽寺莊副巡檢阿里根寺家奴死之甲辰宋人焚黃澗執巡檢高顯十月丁丑宋人襲北陽唐州軍事判官撤覩死之十一月乙酉宋人入內鄉攻洛南之固縣商州司獄壽祖追至丹河擊敗之丁酉詔山東陝西帥臣訓練士卒以備非常分給邊帥銀十五萬兩募民偵伺復遣武衛軍副都指揮使完顏太平殿前右衛副將軍蒲察阿里赴邊伺其入伏兵掩之六年正月丁亥宋使陳克俊等賀正已畢朝辭遣御史中丞孟鑄就館諭曰大定初世宗皇帝許宋世爲姪國朕遵守遺法和好至今豈意爾國屢有盜賊犯我邊境以此遣大臣

宣撫河南軍民及得爾國右司公移稱已罷黜邊臣抽去兵卒朕方以天下爲度不介小嫌罷宣撫司未幾盜賊甚于前日比來羣臣屢以爾國渝盟爲言朕惟和好歲久委曲涵容恐姪宋皇帝或未詳知若依前不息雖兼愛生靈豈能終已卿等當以朕意具言之汝主丙申宋興元守將吳曦遣兵圍林熟龍堡部將蒲鮮長安擊走之斬其將丁未如春水庚戌宋人入撤牟谷陝西統軍判官完顏擱刺鞏州兵馬鈐轄完顏七斤約宋西和州守將會境上俄伏發爲所襲木波部長趙彥雄等七人死焉擱刺馬陷淖中中流矢七斤僅以身免二月甲戌詔按察司旣差監察體訪復遣官覆察誠爲繁冗自今差監察時卽別遣官與俱更不覆察明昌初奉御蒲察五斤出使山東因河間百姓饑移提刑司開倉賑之還具以聞時上初臨政太傅徒單克寧

言不宜假近侍人權乃治其專擅之罪杖之二十至是上思之  
 由泰州都監名爲右振肅己酉宋人攻靈壁四月丙辰圍壽春  
 告急于亳州防禦同知賢聖奴將步騎六百赴之乃退癸亥河  
 南統軍使紇石烈子仁等遣嚴整閻忠周秀輩入襄陽覘敵還  
 言皇甫斌兵四萬規取鄧州以叛人田元爲鄉導三萬人規取  
 唐州以張貞張勝爲鄉導俱授統領官朝命聚鄭汝陽翟之兵  
 于昌武統以南京副留守兼兵馬副都總管紇石烈毅聚亳陳  
 襄邑之兵于歸德統以河南路副統軍徒單鐸子仁自以所部  
 兵駐汴其山東兩路軍七千駐大名河北東西路軍萬七千屯  
 河南咸給以馬易其老弱者時知鳳翔完顏昱平涼同知蒲察  
 秉鉉分駐鳳翔諸隘乾州刺史完顏思忠扼六盤陝西副都統  
 幹勒牙刺京兆推官蒲察秉彜戍號華扼潼關蒲津陝西都統

完顏忠京兆同知烏古論州守京兆要害以鳳翔臨洮路舊  
 漢弓箭手及緋翮翅軍散分邊陲軍名也元帥右監軍蒲察貞  
 分總其事甲子宋人攻天界乙丑入東柯谷部將劉鐸戰敗  
 之內寅仍詔揆領行省于許以便宜升諸道統軍司爲兵馬  
 都統府盡徵諸道兵授紇石烈執中山東西路兵馬都統使定  
 海軍節度使完顏撒剌副完顏克爲陝西五路兵馬都統使  
 知臨洮府石抹仲溫副之聽揆節制辛未曦攻來遠鎮之蘭  
 家嶺丙子詔內外各照官納馬丁丑宋人入新息內鄉又入  
 泗州戊寅入褒信己卯入縣庚辰入穎上五月壬午宋李爽  
 圍壽州俊邁入蘄縣秦詵蔡州防禦使完顏佛住敗之又入  
 金城海口殺長山尉執二巡檢以去丙戌遣告天地太廟社稷  
 宋叛盟出師丁亥親告于慶宮戊子加揆兼左副元帥完顏



匡右副元帥克與蒲察貞為右都監知真定府烏古論誼為左都監辛卯以南征詔中外賜唐州刺史吾古孫兀屯總押鄧州軍馬事完顏江山爵各二級蔡州防禦使完顏佛住爵一級授嚴整嵩州巡檢使賜爵八級錢二百萬餘賞賚有差上以宋兵方熾東北新調之兵未集河南之衆不足支命河北大名北京天山之兵萬五千屯真宗河間清獻等以為應壬辰諭尚書省今國家多故凡言軍國利害五品以上官以次奏陳朕將親問之六品以下具帖子進及巴山東路災赦死罪已下宋旧俊邁攻宿州安國軍節副納蘭那烈等出兵擊之因中流矢宋郭倬李汝翼以衆繼至遂圍州州于寅復為那烈等擊敗俊邁退保于蘄癸卯執之甲辰皇...斌攻唐州吾古孫兀屯拒之行省遣泌陽副巡檢納合軍勝...援遂擊敗之六月辛亥朔揆遣人

捷并送俊邁赴闕降詔褒諭賜紇石烈貞并那烈史乞搭等爵賞有差宋將李爽圍壽州刺史徒單義拒守踰月不能下壬子河南統軍判官乞住及哥等以兵來援義出兵應之爽大敗與其副田林僅脫身而去餘兵赴淮者衆脫者纔十之四丁巳詔彰德府宋韓侂胄祖琦墳毋得損壞仍禁樵採庚申右翼都統完顏賽不敗宋曹統制于漆水辛酉詔有司凡宋宗族所居各具以聞長官常加提控壬戌平章揆遣人報壽州捷戊辰詔升壽州為防禦以義為使免今年租稅諸科名錢釋死罪以下擢乞住昌武軍節度同知貢哥河南路統軍判官都統賽不副統蒲鮮萬奴各進爵一級賜金幣有差辛未木星晝見至七月戊申經天乙亥曦兵六千攻鹽州鞏州戍將完顏王喜隊校僕散六斤猛安龍延常擊走之斬首二百級七月癸未宋商榮攻

東海縣令完顏卞僧復敗之還中伏矢死贈海州刺史給其家銀五百兩絹百匹仍官一子甲午宋統制戚春以舟師攻邳州刺史完顏從正敗之春赴水死斬其副夏統制八月庚戌山東帥來報邳州之捷乙亥赦唐鄧穎蔡六州免來年租稅三分之一九月詔安慰陝西畧曰京兆鳳翔臨洮三路百姓因被宋兵逼脅或背國從僞沒落外境若能自歸者依舊各令復業元拋地土依數給付其受宋人旗榜結構等值時驚擾因而避役逃亡未發覺者許令所在官司陳首並行釋免更不追究軍前可用之人隨宜任使限外不首復罪如初辛未宋程松遣將曲昌世襲方山原自率兵數萬分道襲和尚原西山寨龍門等關是日大霧四塞旣而暴雨戍兵不知其來松遂據之蒲察貞遣行軍副統裴滿阿里隴州同知完顏孛論伏兵千人方山原下萬

已輿屯撤合門美原縣令木虎合沓別將壯士五百取間道潛登出宋兵上自高而下宋兵大駭伏兵合擊遂破之貞乃分遣合沓部將完顏出軍奴率兵千人出黃兒谷取和尚原會州同知女奚列南家押軍猛安粘割撤改率兵千人出大寧谷取西山寨貞自以兵七百由中路取龍門等關時已焚閣道且修且進至小關松將楊廷據險注射貞不得前復令阿里爲疑兵潛遣猛安胡信率甲士五十繞出其後反擊宋兵大亂就陣斬廷衆走二里關復敗宋將彭統導領走龍門追擊大破之合沓乘夜潛登和尚原絕頂宋人驚以爲神皆散走破其衆二千生獲數十人南家斬木開道以登西山再與宋兵遇皆敗之遂盡復故地乙酉甫夜北方有赤白氣數道起于王良之下行至北斗開陽搖光之東庚寅敕行尚書省有方畧出衆武藝絕倫才幹

辦事工巧過人者其招選之戊戌左丞僕散端行省于汴己亥  
戶部侍郎梁鏗行六部尚書事於山東辛丑夏國王李純祐廢  
遣左司郎中溫迪罕思敬冊其姪李安全爲夏國王甲辰曦將  
馮興楊雄李珪等入秦州承裕等又擊破之斬雄珪十月戊申  
朔揆督諸道進兵行省兵三萬出穎壽河南路子仁兵三萬出  
渦口匡兵二萬五千出唐鄧執中兵二萬出清口克兵一萬出  
陳倉貞兵一萬出成紀完顏綱步騎一萬出臨潭仲溫步騎五  
千出鹽川完顏璘五千出來遠十一月壬午匡攻下棗陽取隨  
州遂攻襄陽破其外城丁亥揆克安豐軍取霍丘克含山次廬  
江執中克淮陰遂圍楚州綱圍祐州下荔川閻川等城子仁克  
定遠縣滁州下來安全椒貞克天水宕昌西和州壬辰宋督祝  
汴淮兵馬事丘密遣劉祐來乞和庚子日斜有流星二光芒如

炬幾及一文起東北沒東南癸卯密復遣林拱宋顯等以書幣  
乞和十二月丁未朔匡復克宜城揆攻和州壬子貞又克成州  
綱次大潭縣降之癸丑宋吳曦納款于綱戊午克攻下大散關  
遣兀顏抄合下鳳州己未子仁克真州密復遣陳壁等奉書乞  
和乙丑元帥揆班師戊辰綱以朝命假太倉使馬良顯齎詔書  
金印立曦爲蜀王詔畧曰威畧震主者身危功蓋天下者不賞  
卿家專制蜀漢積有歲年猜嫌旣萌進退維谷君臣之義已同  
路人譬之破桐之葉不可復合騎虎之勢難以中下朕每一思  
之未嘗不當饋歎息而卿猶偃然自安且卿自視翼贊之功孰  
與岳飛一旦見忌遂被參夸之誅故智者順時而動明者因機  
而發比年趙擴昏孱受制強臣頓違誓約增屯軍馬招納叛亡  
失道如此亡不旋日朕已分命虎臣臨江問罪長驅並駕飛渡

有期此正豪傑分功之秋卿以英偉之姿處危疑之地必能深  
識天命洞見事機若按兵閉境不爲異同使我師併力巢穴而  
無西顧之虞則全蜀之地卿所素有當加封冊一依先朝故事  
更能順流東下助爲犄角則旌麾所指盡以相付天日在上朕  
不食言已巳曦遣果州團練使郭澄提舉仙人關使任辛奉表  
及蜀地圖志吳氏譜牒來上答以誓詔壬申朝辭諭以汝主立  
國日淺恐宋兵侵軼人心不安凡有當行事務移文與綱計議  
或有緊急卽差人講究大定間嘗因事入覲今亦多歲懷想不  
忘欲得其繪像親如見面可俟封冊使回日附進 七年正月  
戊寅敕宰臣舉材幹官同議南征事辛巳詔御史大夫崇肅同  
判大睦親事徒單懷忠吏書范楫戶書高汝礪禮書張行簡知  
大興府溫迪罕思齊等十有四人同對于慶和殿壬午復詔百

官同對于廣仁殿庚寅揆還駐下蔡有疾代以左丞相崇浩巳  
亥有司奏更定茶禁辛丑匡取穀城二月丙辰赦鳳成西和階  
山五州宋知樞密院張巖遣方信孺以書詣揆端乞和巳未匡  
克荆門軍癸亥吳曦遣使三奉表來謝封爵陳誓言且賀全蜀  
內附親王百官稱賀癸酉遣木虎高琪翰林直學士喬宇冊曦  
爲蜀國王是月曦復被誅詔贈太師命德順州刺史完顏思忠  
招魂葬于水洛縣以族兄吳端子爲曦後三月戊子幸太極宮  
庚寅詔撫諭陝西軍士壬辰宋復攻破階州癸巳破西和州乙  
未綱至鳳翔詔撤五州之兵分保要害庚子詔諸軍還以近侍  
局直長爲四川安慰使四月癸丑宋又乘蒲察真撤黃牛戍遂  
攻破散關鞏州鈐轄完顏阿失死之戊辰詔元帥府分遣諸將  
遊奕淮南諸州癸酉復下散關五月丙申宋張巖復遣信孺以

書至增幣乞和安丙遣李孝義率步騎三萬攻秦州圍皂角堡高琪以兵赴之七戰而解其圍六月乙巳朔詔朝官六品外官五品以上及親王舉通錢穀官一人攝侍御史王維翰奏事殿中帝稱曰嘉卽以授之河南旱蝗詔維翰體究田禾分數以聞七月庚辰雨復詔維翰雨雖霑足秋種過時使多種蔬菜猶愈于荒萊也蝗蝻遺子如何可絕舊有蝗處諭百姓使知來歲宜種麥壬午詔民間交易典質一貫以上並用交鈔毋用錢八月戊申宋張巖復遣信孺齎其主誓書蔡來乞和十月己巳詔定隨軍遷賞及南征將士功賞格辛未陝西宣撫使徒單益分遣新道口副統把回海攻下蘇嶺關十一月癸酉都統押剌拔鶻嶺關把回海取小湖關敖倉進至營口鎮遂取其城丙子免胄遣王柟以書來乞和再稱伯復增歲幣犒軍錢誘蘇師且函首

以獻丙戌尚書省奏陝州防禦使紇石烈孛孫禁民糶罪之壬辰宋錢象祖以誅侂胄移書行省詔完顏匡檄于宋函首以贖淮南故地十二月壬寅朔翰林直學士陳大任修遼史成詔新定學令削去薛居正五代史止用歐陽修所撰丙午詔策論進士免試弓箭擊毬八年正月癸酉詔收毀大鈔行小鈔之亥宋安丙遣兵襲鶻嶺關把回海擄刺擊走之斬其將景統領丙子左司郎中劉昂通州刺史史肅監察御史王宇吏部主事曹元員外郎徒單永康太倉使馬良顯順州刺史唐括直思白坐與蒲陰令太中私議朝政皆杖之癸未如春水丙戌如光春宮二月乙巳宋錢象祖遣王柟請川陝關隘甲寅如建春宮庚申諭有司時方農作雖在禁地亦令耕種己巳還宮三月庚寅諭尚書省與宋和上問宋人復能背盟否右司郎中王維翰對

曰宋主怠于政事南兵佻弱兩淮擾後千里蕭條其臣懲侂冑師且無復敢執其咎者不足憂也四月癸卯日暈三重皆內黃外赤戊申禘于太廟庚戌如萬寧宮甲寅敕尚書省北邊無事東北路招討司還治秦州就兼節度使其副招討仍置于邊詔諭有司以苗稼方興宜速遣官分道巡行農事以備蟲蝻問月辛未上諭宰臣翰林侍讀學士蒲察畏也言宋通謝使雖未到闕當先擇報聘人其言甚當此方更始之際凡有禮數皆在奉使自後永為成例不可不慎甲午雨雹五月丁未御應天門備黃麾立仗親王文武合班起居上表稱賀遣戶書高汝礪禮書張行簡奏告天地武衛都指揮徒單鏞告太廟御史中丞孟鑄告社稷尚書省宣露布懸宋賊臣韓侂冑蘇師旦首于通衢漆而藏之軍器庫頒詔天下己未更元帥府為樞密院癸亥移天

壽節於十月十五日六月癸酉宋通謝使禮部尚書許奕右武衛上將軍吳衡等奉其土書入見甲戌謁謝于衍慶宮癸未以許宋平詔中外免河南山東陝西等六路今年夏稅河東河北大名等五路半之戊子飛蝗入京畿詔遣使分路捕之丁酉以副都黥檢完顏侃為宋諭成使禮部侍郎喬守副之七月詔頒捕蝗圖于中外戊申宋使朝辭答書通謝并致誓書八月壬申更定遼東行使鈔法癸酉如建春宮庚寅如秋山九月甲子遣吏部尚書賈守謙等一十三人分詣諸路與各路按察司官推排民戶物力上名見香閣諭以除推收外其銷乏者當盡除之如一戶元物力三百貫今蠲減二百五十貫猶不能當新強者如一戶三百貫勿添盡量存氣力止添二百貫卿等宜各用心十年之間百姓應當賦役利害非細苟不稱所委治罪當不輕

也十一月丁酉朔詔諸路按察使並兼轉運使初設三司使掌  
判鹽鐵度支勸農事以樞密使紇石烈子仁兼之癸卯詔戒諭  
尚書省國家之治在於紀綱紀綱所先賞罰必信今乃上自省  
部之重下逮司縣之間律度弗循私懷自便遷延曠歲苟且成  
風習此爲恒從何致理朝廷者百官之本京師者諸夏之儀其  
勗自今各懲已往遵繩奉法竭力赴功無枉撓以徇情無依違  
而避勢壹歸于正用範乃民是日御臨武殿試護衛丁未敕諭  
臨潢泰州路兵馬都總管承裔等修邊備乙卯帝不豫丙辰崩  
于福安殿年四十一大安元年正月諡曰憲天光運仁文義武  
神聖英孝皇帝廟號章宗二月甲申葬道陵帝在位二十年  
承世宗治平日久宇內小康乃正禮樂修刑法定官制典章文  
物粲然成一代治規又數問侍臣漢宣綜核名實唐代考課之

法蕃欲跨遠未而比跡于漢唐羣臣內外上下章數十上請正  
尊號固却不受以終其身亦可謂有志於治者矣然婢寵擅朝  
冢嗣未立疏忘宗室傳授匪人向之所謂維持鞏固於久遠者  
徒爲文具而不得爲後世子孫一日之用金源氏從此衰矣

弘簡錄卷一百十八

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金主之七

衛紹王諱允濟小字典勝以避顯宗諱改允爲永乃世宗第七子母元妃李氏王長身美髯天資儉約不好華飾初封薛王進滕王大定十七年授世襲猛安二十五年加開府儀同三司二十六年爲祕書監明年轉刑部尚書又明年改殿前都點檢章宗初進封潞王起復判安武軍節度使五月至冀州到任表謝恩詔優答進封韓王明昌四年改判興平軍五年轉沁南軍承安二年封衛王三年改昭義軍泰和元年判彰德府五年判平陽府又改武定軍節度使初章宗誅鄭王永蹈趙王允中久願



引簡錄  
悔之八年十一月衛王入朝時章宗已感嗽疾因無繼嗣其諸  
叔并兄弟雖存意皆不在惟愛王柔弱鮮智能故獨留之王自  
以承蹈母弟堅辭欲行上力疾與之擊毬因語王曰叔不欲作  
王人遽辭去耶無何大漸王尚未發李氏及黃門李新喜平章  
完顏匡定策傳遺詔畧曰皇叔衛王承世宗之遺體鍾厚慶於  
元妃人望所歸曆數斯在今朕上體太祖皇帝傳受至公之意  
付昇寶祚卽皇帝位於樞前衛王固讓再三始承詔舉哀明日  
羣臣朝見于大安殿詔路府州縣爲大行皇帝服七日  
大安元年正月辛丑飛星如火起天市垣有尾跡若赤龍壬戌  
改元大赦立元妃徒單氏爲皇后二月乙丑朔太白晝見經天  
壬辰詔曰章宗皇帝以天下重器畀于眇躬遺旨掖庭內人有  
娠者兩位如其中有男則立爲儲貳如所生皆男則擇其可立

者立之申論多方峻如天日朕思克副遺意曲爲盡心昨聞有  
爽于安養朕憂念不置軫懷靡寧告于先帝願降靈禧默賜保  
全早生聖嗣甲午命欽懷皇后母鄭國公主及乳母蕭國夫人  
守視大臣專爲調護丁酉平章僕散端左丞孫卽康奏言賈氏  
當以十一月免乳今已出三月范氏產期合在正月而太醫副  
使儀師顏言自年前十一月診得范氏元氣有損調治迄今脉  
息雖和胎形已失及范氏自願於神御前削髮爲尼庚子封皇  
子六人爲王三月甲辰道陵禮成大赦詔自今於朕名不連續  
及景詠等字不須別改五月宋與高麗遣使來賀卽位七月幸  
海王莊臨奠魯國公主八月帝生日爲萬秋節各遣使來賀九  
月如大房山謁奠睿裕道二陵百官表請建儲不允十月歲星  
犯左執法已卯詔戒勵風俗十一月平陽地震有聲如雷自西

北來壓死民口甚衆十二月詔一戶三人死者免租稅一年二人及傷者免半年貧民給葬錢五千傷者三千二年正月庚戌朔日中有流星出大如盆其色碧向西行漸如車輪尾長數丈沒于蜀中至地復起光散如火二月客星入紫微垣光散爲赤龍地大震有聲如雷四月校大金儀禮北方有黑氣如大道東西亘天徐邳州河清五百餘里以告宗廟社稷五月詔儒臣編續資治通鑑六月大旱下詔罪已振貧民闕食者曲赦西京太原兩路雜犯死罪減一等徒以下免丙寅地震至七八月不止乙丑立子胙王從恪爲皇太子丁卯獵于近郊戊辰夏人侵葭州九月地大震乙未詔求直言招勇敢撫流亡庚子遣使慰撫宣德行省軍士丙午京師戒嚴上日出巡撫百官請視朝不允辛亥宣德行省罷癸丑詔撫諭中都西京清倉被兵民戶十

一月獵于近郊中都大悲閣東渠內火自出逾旬乃滅閣南剝竿下石罅中火自出人近之卽滅俄復出如是者復旬日中都火燠民居是歲大饑禁百姓不得傳說邊事三年正月乙酉朔熒惑入氏中宋高麗夏遣使來賀二月熒惑犯房宿有大風從北來發屋折木通玄門與東華門重關俱折閏月熒惑犯鍵閉星三月大悲閣災延及民居有黑氣起北方廣長若大堤內有三白氣貫之如龍火狀詔括民間馬令職官各出有差四月當元兵起遣西北路招討使粘合合打乞和不許六月壬寅更定軍前賞罰格八月獎諭行省官獨吉思忠完顏承裕等河南大名路軍逃歸下詔招撫之九月思忠承裕敗績于會河堡全軍皆覆居庸關失守萬戶瓜頭屯古北口禁男子不得輒出中都城門外元前軍至中都中外戒嚴十月每夜初更正東西北

弘簡錄 卷一百一十八  
天明如月初出經月乃滅熒惑犯壘壁陣上京留守徒單鎰遣同知烏古孫兀屯將兵二萬衛中都上巡撫諸軍十一月殺河南陳言人郝贊右丞相鎰簽中都在城軍時德興弘州昌平懷來縉山豐潤密雲撫寧集寧東過平灤南至清滄由臨潢過遼河西南至忻代皆歸于元十二月簽陝西兩路漢軍五千人赴中都太保張行簡丞相僕散端宿禁中議軍事

崇慶元年正月朔改元赦宋夏遣使來賀三月大旱遣使冊李遵頊爲夏國王夏人犯葭州延安路兵馬總管完顏奴婢禦之五月簽陝西勇敢軍二萬人射糧軍一萬人赴中都括陝西馬詔賣空名勅牒河東陝西大饑斗米錢數千流孳滿野以南京留守僕散端爲河南陝西安撫使提控軍馬七月有風自東來吹帛一段高數十丈飛動如龍形墜於拱辰門八月萬秋節以

兵事不設宴十月曲赦西京遼東北京十一月振河東南路南  
京路陝西東路山東西路衛州旱災十二月夏遣使謝封冊

至寧元年正月遣官振河東陝西饑二月詔撫諭遼東三月太陰太白與日並見相去尺餘五月改元詔諭咸平路契丹部人復起嘯聚者六月陝西大旱夏人犯保安州殺刺史又犯慶陽府殺同知七月以刑部尚書王維叅知政事八月戊子大霧晝晦治中福海別將兵屯城北辛卯胡沙虎矯詔以誅反者爲名招福海執而殺之奪其兵壬辰遂作亂甲東華遣人呼守直親軍百戶冬兒五十戶蒲察六斤不應許以世襲猛安三品官職亦不應都點檢徒單鎰縋而出護衛斜烈乞兒親軍春山共培鏤啓門胡沙虎以兵入宮盡逐衛士代以其黨癸巳逼帝出宮載以素車囚之故邸以武衛軍二百人錮守之遣黃門入收符

璽尚宮左夫人鄭氏端居璽所聞變拒其人曰璽乃天子所用汝何人敢取之黃門曰今天時大變主上猶且不保况璽乎御侍當思自脫計鄭厲聲罵曰若輩宮中近侍恩遇尤隆君難不以死報之反為逆賊奪璽耶我死可決璽必不與遂瞑目不語黃門出胡沙虎使宦者李思中弑帝於邸立宣宗請廢為庶人詔百官二百餘人議衆相視莫敢言獨拾遺白廷秀奮然曰先朝素無失德在禮不當廢從之者禮書張敬甫戶部武文伯諫議張信甫龐才卿石抹晉卿等二十四人太保張行簡請用漢昌邑王習海西公故事降為侯侍御史完顏訛出等十人請降復王封胡沙虎執前議紛然不定宣宗曰譬諸問途百人曰東行是十人曰西行是行道之人果適東乎適西乎朕徐思之丙戌降封東海郡侯十月辛亥虎被高琪殺甲寅諫議張行信上

論曰春秋之法國君立不以道若嘗與諸侯盟會即列為諸侯東海在位已六年矣為其臣者誰敢干之胡沙虎握兵入城躬行弑逆當是時惟鄴陽石古乃率衆赴闕論其忠烈在朝食祿者皆當愧之陛下始親萬幾海內望治亟宜褒顯延及子孫庶幾少慰貞魂激天下義氣宋徐羨之弑營陽王立文帝即位誅之亦以奉迎之功特免妻子胡沙虎國之大賊世所共惡今雖已死而罪名未正合暴其過惡先布中外除名削爵緣坐其家然後為快陛下若不忘援立之勞則依倣元嘉故事亦足以示懲戒癸未宣宗乃下詔削虎官爵封鄭氏資明夫人凡從石古乃鄴陽戰者千戶賞錢五百貫謀克三百貫蒲鞏散軍二百貫各遷官兩階戰沒者贈賞付其家冬兒加龍虎衛上將軍再遷宿直將軍蒲察六斤加定遠大將軍武衛軍鈐轄貞祐四年詔

追復衛王諡曰紹 時因亂後記注亡失史不復載逮元中統  
間翰林學士承旨王鶚采摭當時詔令故金部令史竇祥年八  
十九能記憶舊事從得二十餘條司天提點張正之寫災異十  
六條張承旨家載舊事五條楊雲翼目錄四十條陳老目錄三  
十條藏在史館今校其重複刪其繁雜畧存梗槩又於金掌奏  
日女宮大明居士王氏所記得資明夫人授壘事附著于篇

載記 金主八之上

宣宗皇帝諱吾睹補顯宗庶長子母昭華劉氏大定三年癸未  
三月十三日生世宗養于宮中十八年封溫國公特進二十  
六年賜名珣二十九年進封豐王加開府儀同三司累判兵吏  
部并永定軍永安元年進封翼王泰和五年改賜名從嘉八年  
進封邢王又封昇王判彰德軍所至著祥異紇石烈執中遺

黨徒單銘等迎于彰德既至親王百官上表勸進九月甲辰  
皇帝位於大安殿加執中太師乙巳朔諭尚書省凡事規畫悉  
依世宗所斷行之羣臣若有見聞各直言勿隱丁未臨奠于衛  
王第有司奏舊禮當設坐哭上命撤坐伏哭盡哀勅有司以禮  
改葬戊申御仁政殿視朝壬子改是年為貞祐元年大赦恩賚  
中外臣民有差丙辰左諫議張行信上言崇節儉廣聽納明賞  
罰三事上納之丙寅詔諭六品以下官事有可言者言之無隱  
閏月戊辰朔拜日子仁政殿自是每月為常庚午告天地廟社  
復舊名珣詔中外不須迴避前所更名辛未追尊皇妣為皇太  
后是日皇妃皇子至自彰德甲申立子守忠為皇太子甲午減  
定監察御史為十二員十月丁酉朔元兵下涿州京師戒嚴辛  
丑元遣乙里只來壬子設京城鎮撫彈壓官置招賢所癸亥放

弘簡錄 卷一百一十八  
宮女百三十八十一月戊辰夏人攻會州徒單醜兒出兵擊走  
之庚午詔百官會議尚書省乞和于元癸未元兵徇河間府并  
滄與觀州乙未定亡失告身文憑格十二月丁酉朔上御應天  
門詔諭軍士仍出銀以賜之 二年正月丁卯朔邊事亟免朝  
賀辛未元兵徇彰德府宋人攻秦州統軍使石抹仲溫擊却之  
癸未從有司奏權止今年禘享朝獻原廟及皇太后冊禮乙酉  
元兵徇益都府乙未徇懷州沁南軍節度使宋晟死之二月壬  
子元乙里只札八來丙辰罷按察司壬戌元乙里只復來三月  
辛未遣左丞完顏承暉詣元軍請和丁丑赦國內癸未大括粟  
庚寅詔百官議于尚書省奉衛紹王公主歸元議和是爲公主  
皇后辛卯詔許諸人納粟買官壬辰元兵下嵐州四月戊戌奉  
遷昭聖皇后柩權厝于新寺時山東河北諸郡失守惟真定清

沃大名東平徐邳海州數城僅存河東州縣亦多殘燬庚子元  
允和議兵退大赦國內命僕散安貞與兵部尚書裴滿子仁刑  
部尚書武都分道宣撫安集遺黎甲辰詔有司具陣亡人子孫  
以備錄用乙卯從尚書省奏巡幸南京己未葬衛紹王五月乙  
亥決意遷都詔告國內太學生趙昉等四百人上章極論和議  
之害朝廷大計已定不能中止慰諭遣之丙子詣原廟奉辭戊  
寅先詔諭僕散端等壬午車駕發中都丙戌次定興禁有司扈  
從踐蹂民田所踐禾稼計直糶之丁亥次安肅州完顏弼以兵  
迎見癸巳次中山府六月癸丑次內丘縣戊午次彰德府曲赦  
境內庚申次鉅橋鎮南京行宮寶鎮閣災壬戌次宜村黃龍見  
西北七月車駕至南京立元妃溫敦氏爲皇后百官上表稱賀  
庚子皇太子至詔曲赦中都路丁未夏人入邊命移文責之甲

寅罷經畧司九月壬戌朔日食皇孫生癸亥山東路報萊州之捷庚辰詔訓練軍士丁亥太白晝見于軫戊子禁軍官圍獵十月甲午詔遣官市木波西羌馬陝西軍戶戰死者給糧贍其家丁酉元兵徇順州丙辰元兵收成州諭大名行省孛術魯德裕貶損用度十一月辛未賜衛紹王家屬餼廩癸酉詔有司答夏國牒丙子許諸色人試武舉蘭州譯人程陳僧叛西結夏人為援辛巳熒惑犯房宿鈞鈴星癸未曲赦遼東路勅罷宣撫司輒擬官十二月頒勸農詔戊戌遣真定元帥永錫等援中都丁未以和議既定聽民南渡乙卯元兵徇懿州三年正月辛酉朔宋遣使來賀壬戌遣內侍諭永錫防邊毋以和議為辭癸亥曲宴宋使及羣臣甲戌定文武五品以上待坐員遂為常制乙丑詔宣撫阿海總管合住討賊劉二祖張汝楫戊辰從尚書省言

內外軍人入粟補官者多行伍浸虛請俟平定應監差者與三酬門戶有職事者陞一等其子弟應膺者罷之乙亥夏人犯環州北京軍亂殺宣撫使與屯襄曲赦其罪獎諭官吏命招撫之丁丑右副元帥蒲察七斤以其軍降於元中都允急詔元帥左監軍永錫將中山真定保涿兵一萬左都監烏古論慶壽將大名兵萬八千以御史中丞李英運糧大名行省叅政孛術魯德裕調發詔曰中都重地廟社在焉宜急往援付以空名宣勅許視功遷叙逗撓者治以軍律辛巳皇太子疾輟視朝乙酉薨二月辛卯環州刺史烏古論延壽及斜卯毛良虎等敗夏人于州境詔進官有差元使乙里只來勅宗臣饋以酒饌乙未改寧邊州隸嵐州丁酉從戶部郎中與屯阿虎請諸色人遷官並視女直人有司妄生分別以違制論丙午尚書省以南遷後吏部秋

冬置選南京春夏置選中都赴調者不便請併選於南京從之  
丁巳日初出赤如血欲沒復然戊午大風壞隆德殿鴟尾時河  
北殘燬官吏多求河南差占以避難三月壬戌詔文武五品以  
上辟舉州縣官不聽以他事差占仍勒終任有勞績者升以選  
領職事應降罰者亦止本處居住有任兵戍者不可離別注以  
往丙寅勅河東河北大名長貳官訓練隨處義兵鄰境有警責  
其裒援降人自拔歸國者遷職仍列其姓名以招諭來者五品  
已上官公舉沿河州縣官罷軟不勝職任者汰去仍許今季到  
部人內先擇能者量緩急易之乙亥永錫慶壽兵至霸州北李  
英被酒軍無紀律元兵攻之遂大敗丁丑勅遼東宣撫使蒲鮮  
萬奴選精銳屯瀋州廣寧以候進止壬申立上生日爲長春節  
宋遣使來賀戊寅諭尚書省自去冬不雨雪議弛諸處碾磴以

其水溉民田己卯始雨庚辰從御史臺言在京軍官及委差官  
芻糧券例悉同征行密院委差有俸人吏非征行不必給壬午  
山東宣撫司報大沫堦之捷夾谷石里哥及沒烈擒賊渠劉二  
祖等斬之前後殪賊萬計己丑曲赦山東路禁州縣置刃於杖  
以決罪人時京師道遠隔絕前京兆治中李友直結華州防禦  
同知馮朝河州防禦判官郝遵甫平涼同知致仕楊庭秀水洛  
縣主簿宿徽等團集州民號忠義扈駕相挺爲亂殺其防禦判  
官完顏八斤及城中女直人以書約長勝軍都統楊珪爲府兵  
所得珪諱之請自效誘友直等執之麾所招千餘人納仗阮諸  
城下安撫司以便宜族友直等事聞增八斤及被害官軍十餘  
人各一官賻錢三百貫珪伏誅四月丙申河南路蝗遣官分捕  
上諭宰臣朕在潛邸聞捕蝗者止及道傍使者不見處卽不加



意當以此意戒之又言舊制夏至後免朝四日一奏事此在平時可也方今多故勿憚朕勞但使國事無廢則善矣癸卯籍起選監當官爲軍乙巳罷南京行六部尚書曲赦蒲察七斤脅從黨與募能殺獲者以其官官之丙午以調度不給罷隨朝六品以下官奉應輸備錢減經兵州府縣官吏及脩內軍夫有祿人被差不出本境者竝罷給券出境者以其半給之丁未啓故皇太子菽權葬迎朔門外諡曰莊獻壬子遣使同山西宣撫司招撫軍民選其民勇健者爲軍仍降詔諭有司勿拒河北避兵之民所至加以存卹檢覈朝廷差遣官券曆無故稽留中道者罪之中都破壬戌降空名宣勅紫衣師德號度牒以補軍儲辛未立守忠子鏗爲皇太孫數月天諡曰冲懷辛巳上諭宰臣多事之秋陳言者朕於宮中置局命方正官數員擇可取者付出施

行戊子謀伐西夏遣大臣鎮撫京兆七月戊午朔元兵收濟源縣已未徵弓箭于內外品官三品以上三副四品五品二副餘以等級徵之丁憂致仕者免庚申置陳穎漕運提舉官以戶部勾當官往來督察是夕有星如太白色青白有尾出紫微垣北極傍入貫索中辛酉詔河間孤城移其軍民就粟清州河北郡縣軍須並減河南之半壬戌括民間騾付諸軍與馬參用癸亥定尚書所造諸符樞密院鹿宣撫司魚都統司虎甲戌借平陽民租一年命裁損宮中歲給減致仕官俸給之半丁丑肅宗與明德皇后神主至自中都奉安于明俊殿戊寅月入畢宿戊夜犯畢大星甲申改交鈔名貞祐寶券八月戊子朔以陝西統軍使完顏合打簽樞密院事己丑制軍府庶事樞密院官須與經歷官裁決經歷議是而院官不從許直以聞癸巳詔遣官體究

京西路新遷軍戶壬子置行省于陝西乙卯增沿河闡糴之法  
十取其八以抑販粟之弊仍嚴禁私渡增步軍萬人戍京以西  
四萬人戍京以東選陝西騎兵二千增京畿之衛諭陝西堅守  
延安臨洮環慶蘭會保安綏德平涼德順鎮戎涇原鄜坊邠寧  
乾耀等處要害分渭南州郡步兵屯平原令宣撫使治邠州副  
使治同州之澄城以統之更以步騎守沿渭諸津九月丁巳朔  
定職官避難不仕違限者奪三官永不升注丙寅樞密院言邊  
事方急昨陝西河東世襲蕃部巡檢與猛安謀克例罷其俸宜  
仍給之庶獲其用其西邊弓箭手有才武出衆獲功未推賞者  
令宣撫司覈實以聞從之戊辰設潼關提控總領軍馬等官置  
河北東路行總管府於原武陽武封丘陳留延津通許杞諸縣  
以治所徙軍戶辛未鎮防軍段仲連進牟三百詔遷三官壬申

建蘇門縣為輝州癸酉朝謁世祖太祖御容于啓慶宮行獻享  
禮始用樂甲戌朝謁太宗熙宗睿宗御容行獻享禮詔開滑濬  
濟曹滕諸州置連珠寨如衛州乙亥詔經兵處河北山東等路  
及平涼慶陽臨洮府涇邠秦鞏德順諸州職事官並以二十月  
為滿募隨處主帥及官軍義軍將校有能率衆復取中都者封  
王遷一品官階授二品職能戰却敵善誘降人取附都州縣者  
予本處長官散官隨職遷授餘州縣遞減二等紅襖賊周元兒  
陷深祁州東鹿安平無極等縣真定帥府以計破之斬元兒及  
殺其黨五百餘人丁丑詔司縣官能募民進糧五千石以上減  
一資考萬石以上遷一官減二資考二萬石以上升官一等法  
見闕庚辰陝西宣撫司來上第五將城萬戶楊再興擊走夏人  
之捷付以空名宣勅凡夏人入寇有能臨陣立功者五品以下

並聽遷授乙酉置大名行總管府于柘城縣以治所徙軍戶十月丁亥夏人入保安都統完顏國家奴破之攻延安戎將又敗之是日捷至戊戌遼東宣撫司報敗留哥之捷丙午夏人陷臨洮陝西宣撫副使完顏胡失刺被執癸丑遼東賊蒲鮮萬奴僭號改元天泰十一月戊午密院進王世安取盱眙楚州之策以爲招撫使與泗州元帥府所遣人同往淮南計度其事戊辰夏人犯綏德克戎寨官軍敗之犯綏平又敗之賞有功將士及來告捷者叅知政事徒單思忠言今陳言者多撥拾細故乞不送省止令近侍局度其可否發遣上曰若爾是塞言路凡係國家者豈得不由尚書省乎庚午上與左丞汝礪商畧遣官括田賜軍之利害汝礪言不便者數端乃詔有司罷其令仍給軍糧之半其半給實價因語宰臣朕恐括地擾民罷其令矣官荒牧馬

地軍戶願耕者聽已爲民承種者勿歛甲戌移刺塔不也軍萬入破夏數萬人於熟羊寨丙子詔市民開輓車羸疾牝馬置羣牧中以圖滋息知臨洮府陀滿胡土門破夏人八萬於城下庚辰上語宰臣舊例點檢左右將軍近侍局官護衛承應人秩滿皆賜匹帛雖所司爲之製造然不免賦取於民近亦罷之止給寶券至於朕所服御亦以官絲付太府監織之自今勿復及民壬午元兵徇彰德府知府陀滿斜烈死之十二月乙酉朔徙朔州民分屯嵐石隰古絳解等州戊子以軍事免樞密院官朝拜庚寅太白晝見壬辰詔免元日朝賀及親王公主進酒乙未太康縣人劉全時濫東平府民李寧謀反伏誅壬寅詔林州刺史惟宏與都提控從坦同經理邊事諸將功賞次第便宜行之四年正月癸亥朔上而諭御史臺今日視朝百官旣拜之後始

弘簡錄 卷二百十八  
聞開封府報衙聲四方多故之秋弛慢如此中丞福興號素謹  
于官事者當一詰之庚午元兵收曹州癸酉更定捕獲偽造寶  
券者官賞已卯立遂王守禮為皇太子邊事未寧稍緩冊寶之  
禮壬午言者請遣官勸農至秋成考其績以甄賞宰臣言民恃  
農以生初不待勸但寬其力勿奪其時則民自勸遣官及擾耕  
業何名為勸上是其言免逃戶租二月甲申朔日食上不視朝  
詔皇太子控制樞密院事有司議典禮以金鑄撫軍之寶授太  
子啓稟之際用之是日元兵圍太原名樞密院官問所以備禦  
之策戊戌免親王公主長春節入賀致禮己亥元兵攻下霍山  
諸隘甲辰命參政李革為脩奉太廟使奏告祖宗神主于明俊  
殿權祔肅宗神主于世祖室奉始祖以下神主于隨室祭器以  
瓦代銅獻官以公服行事供張等物並從簡約庚戌詔凡死節

之臣籍其數立廟致祭三月丁巳曲赦中都河北等路議軍戶  
給地事乙丑延州刺史溫撤可喜上疏言皇太子宜選正人為  
師保己巳命禮部尚書張行信提控社稷預告其事庚午滄州  
經畧副使張文破趙福復恩州丙子曲赦遼東路庚辰復邢州  
捷至四月己丑陝西行省報秦州官軍破妖賊趙用劉高二之  
捷遣官鞫單州防禦使僕散倬之罪罷其城役丙申河南陝西  
蝗丁酉太白晝見于奎己亥夏人葩俄族都管汪三郎進千羊  
率其蕃戶來歸詔納之優給其直辛丑兗州泗水人郝定僭稱  
大漢皇帝署置百官攻陷泰安滕兗單諸州及萊蕪新泰等十  
餘縣滕邳之間道路不通詔樞密院招捕禦備五月癸丑朔行  
都太廟成禮官奏禮從簡約惟以親行祔享為敬請權停鹵簿  
儀仗及宮縣樂舞從之山東行省上沂州捷己巳夏人將圖臨

洮鞏州闕長安命陝西行省嚴爲之備六月壬辰遼西僞瀛王張致遣完顏南合張頑僧上表來歸詔授致特進行北京路元帥府事兼本路宣撫使南合北京兵馬總管同知頑僧廣寧府同知丙申水星晝見于奎百有一日乃伏癸卯詔有司祈雨罷河北諸路宣撫更置經畧司壬子早詔李革審決京師冤獄七月甲寅郝定伏誅乙卯飛蝗過京師勅減尚食品物及後宮歲給縑帛有差閏月辛卯復深州癸巳翰林學士完顏字迭進中興事跡甲午詔舉奇才絕力之士頒格賞罰提控都副統等官互舉其屬許功過相除品官及草澤人一體升降庚子詔河南陝西鎮防軍應磨及納粟補官者當役如舊候事定乃聽赴銓八月甲寅三原縣僧廣惠進僧道納粟多寡與都副威儀及監寺等格從其言鬻之乙亥命大名招撫使募人持詔往諭中都

民丙子元兵攻延安九月辛巳朔攻勞州壬辰攻代州經畧使奧屯醜和尚禦戰敗績身被數創被執欲降不屈死之十月己未上率親王百官奉安祖宗神主于太廟行禘享禮赦中外庚申招射生獵戶練習武藝知山徑者分屯陝虢要地辛酉元兵攻潼關西安軍節度使泥龐古蒲魯虎禦戰戍兵皆潰死之乙丑詔立賞格諭河南官吏軍民募立功之士命叅政徒單思忠提控京師鎮撫移刺周刺阿不屯關陝詔吏禮兵工四部尚書董治防城器械鑿坎穿築垣墻戊辰命張行信攝太尉奉安社稷禮樂咸殺其數已巳元兵徇汝州諭附京民盡徙其芻糧入城官儲併運之汧河惟存通報小舟餘皆焚之庚午詔宿糧州縣簽民爲兵就署隊長以自防遏河南行省胥鼎自將精兵入援上命樞府督軍應之辛未置官領招賢所事有自負長才不

爲人所知者聽赴所自陳其間智勇識畧能區畫者內外官採  
訪以聞得實超任仍賞舉主壬申以龍虎衛上將軍裴滿羊哥  
知歸德府兼行樞密院事丙子知河南府完顏合打以徵兵失  
應坐誅已卯戶部郎中魏琦没于王事命官其子已卯從吏部  
令史韓希祖言自今曾以戰功致身者盡拘京師備用十一月  
庚辰朔增定守禦官及軍人遷賞格乙酉元兵至沔池右副元  
帥蒲察阿里不孫軍潰失其所佩虎符辛卯詔立功五品以上  
官賜饌御前六品以下官賜饌近侍局癸巳上諭皇太子京城  
提控官有以文資充者彼豈知兵其速易之甲午放免諸職官  
僉從及諸司局射糧兵卒嘗邀充軍者戊戌勅諸州縣簽籍軍  
民以備土寇已亥華州元帥府復潼關庚子元兵退罷在京防  
城民軍河南路統軍使紇石烈掃合發兵後期誅之十二月癸

亥元兵攻平陽丙寅徇人名府壬申進自代州神仙橫城及平  
定承天鎮諸盜攻太原府乙亥木虎高琪請修南京裏城時民  
力方困上嘆此役一興病滋甚矣城雖完固朕亦何能獨安此  
乎是歲扶風郿縣蝨傷麥京兆鳳翔同華河南鄧裕汝亳宿泗  
等州大蝗分遣往捕之

興定元年正月癸未宋賀正使朝辭上語宰臣聞息州南境有  
盜此乃彼界饑民沿淮爲亂爾宋人何故來擾高琪請伐之以  
廣疆土上曰朕意不然但能守祖宗所付足矣安事外討琪謝  
臣言誠過今雨雪應期皆聖德所致而能包容小國天下幸甚  
乙未詔中都西京北京等路策論進士及武舉人權試于南京  
東平婆速止京等四路丙申東平行省言調兵以來吏卒因勞  
進爵多至五品例獲封贈及民年七十並該覃恩若人往自陳

公私俱費請命本路爲製誥勅類赴朝廷以求印署使受命者  
量輸諸物而給之庶人力不勞兵食少濟從之乙巳元兵攻觀  
州二月戊申朔初用貞祐通寶一貫當寶券千貫已酉命樞密  
院汰罷軟軍士尚書省議減冗員用官馬給驛傳以紓民力癸  
丑罷招賢所乙卯皇孫生百官稱賀詔無用樂己未元兵徇忻  
代詔定坐乏軍備州縣官積階至三品者聽行部決遣尚書省  
請罷州府學生廩給上不許三月戊寅勅事關刑名當面議之  
勿聽轉奏乙酉上宮中見蝗遣官分道督捕仍戒勿以苛暴擾  
民己亥元兵攻新城庚子攻霸州四月庚戌滕州花帽軍作亂  
詔山東行省討之南陽五朶山盜衆至千餘命節度副使移刺  
羊哥討之遇于方城招降不從上前奮擊殺其衆殆盡戊午單  
州雨雹傷稼詔遣官勸諭農民改蒔秋田官給其種平定州賊

閻德用之黨閻顯殺德川以其衆降時詔興兵伐宋所招義  
各置總領使副叅知政事李革疏請以義軍昇州縣爲今之計  
當養兵息民養銳待敵宋雖造釁止可自備若不恐小忿以勤  
遠畧恐敵乘之反不能交尚書省上奏秋防在邇改法非便姑  
如舊制命州縣各司察之于甲詔諭遼東諸將亟討蒲鮮萬奴  
并捕受僞署官家屬得所降按察使高禮妻子皆戮之五月戊  
寅陝西行省奏破夏人于大北谷丁亥民苑汝濟上書陳言利  
害上以示宰臣有可采者即施行之壬辰延州原武縣雨雹傷  
稼詔官貸民種改蒔癸巳宋人攻潁州焚掠而去戊戌行樞密  
院兵敗宋人于泥河灣又敗之樊城縣辛丑宋人取漣水縣癸  
卯陝西行省奏蘭州水軍千戶李平等苦提控蒲察燕京貪暴  
殺之構夏人以叛脅其徒張宸俱行宸以計盡獲之便宜遷官

四階爲蘭州同知賞士卒有差甲辰元兵下沔城縣軍官任福  
死之丙午定河北求仕官曾經總兵者自樞密院餘驗據聽渡  
河六月己酉脩潼關遣中使持詔及暑藥勞夫匠設潼關使副  
及三門集津提舉官壬子制鄜坊丹州四品以下州縣官視環  
慶例以二十月終更丙辰詔樞密院遣經歷官分諭行院嚴兵  
利器以守衝要仍禁飲宴違者以軍律論戊午宋人合土寇攻  
東海境辛酉以進士朱益草澤人李維嶽論議可取詔給八貫  
石俸自後凡上書人其言已采用者上其姓名已已遼東行省  
遣使來上正月中敗契丹之捷七月辛巳宋人圍泗州壬午圍  
靈璧縣癸未隩州振威軍萬戶馬寬逐其刺史李策據城叛遣  
使招降復叛州吏擒戮之夸其族乙酉宋人襲破東海縣丙申  
置提舉倉場使副癸卯太社壇產嘉禾一莖十穗五穗甲辰夏

人犯黃鶴至官軍敗之乙巳初置集賢院知院事同知院事等  
官宋人及土寇攻汾州經畧使擊破其衆又戰石湫南戰漣水  
縣戰中土橋宋兵敗績夏人圍羊狼寨帥府發諸鎮兵擊走之  
八月戊申木波賊犯洮州行省敗之遁去癸丑宋人攻碓山縣  
爲我軍所敗命大臣議其事集賢院諮議官朱益上書陳禦敵  
三策壬戌海州經畧使阿不罕奴失刺及提控李元與宋人戰  
屢捷多所俘獲甲子徙欄通渡經畧司於黃陵壩乙丑制增定  
擒捕逃軍賞格及居停人罪九月戊寅夏人犯綏德之克戎寨  
都統羅世暉逆擊却之己卯蔡州帥府偵宋人將窺息州以輕  
兵誘其進別以銳師邀擊之鹵其將沈俊壬午改元大赦辛卯  
元兵徇隰州及汾西縣癸巳攻沁州乙未元兵攻太原陂箕掌  
寨丁酉薄太原城攻交城清源癸卯立汾河冰墻鹿角十月丁



未霖雨詔寬農民輸稅之限甲寅命高汝礪張行簡同脩章宗實錄癸丑息州帥府獻破宋人于中渡之捷乙卯元兵徇中山府及新樂縣丙辰丹州進嘉禾異畝同穎辛酉制定州府司縣官失覺姦細罪及職官不求仕規避不赴任法乙丑元兵下磁州又收鄒平長山及淄州壬午從宜移刺買奴言五朶山賊魚張二等屢詔免罪若悉誅之恐乖恩信且其親屬淪落宋境近在均州或相構亂乞貸其死徙之歸德睢陳鈞許間爲便詔許之己丑元兵收山東濱棣博三州庚寅下沂州甲午河西掬納錢納等族千餘戶來歸戊戌元兵攻太原府庚子上語宰臣朕聞百姓流亡逋賦皆配見戶人何以堪又添徵軍須錢太多亡者詎肯復業宰臣請命行部官閱實蠲貸已代納者給以恩例或除他役或減木戶雜征四之一上曰朕於此事未嘗吝其

亟行之十二月甲辰朔元兵攻潞州都統馬甫死之戊申颶風移風若得日本國大船中有太宰府民七十二人因糴遇風飄至中國詔有司覆驗無他給以糧餉俾還本國庚戌元帥左監軍蒲察五斤進右副元帥權遼東行省叅知政事是日元兵平益都府甲寅海州經畧使報提控韓壁敗宋人于鹽倉己未元兵復攻沂州官民棄城遁辛酉又下密州

二年正月乙亥詔議賑恤免中京嵩汝等州逋租壬午宋人攻淮北唐州元帥府擊敗之獲統領季雄韜陳臯以歸癸未元帥并近侍局副使訛可遣使報南師之捷乙酉元兵圍夏王城李遵頊命其子居守出走西涼詔諭諸帥府明斥堠嚴守備戊子宋人攻泗州又戰却之二月癸卯宋人侵青口行樞密院遣兵敗之甲辰克宋散關諭胥鼎可保則保不可保則焚毀而還丙

午訛可敗宋人于防山庚戌海州經畧敗宋兵于胸山表請繼其軍儲督東平帥府發兵護送資糧以應之許州長社縣何冕等謀反伏誅丁巳壽州行樞密院破宋人高柳橋水砦夸其民而還壬戌訛可遣兵拔宋柵碁盤嶺又破其衆於裴家莊寒山嶺龍門關等處得粟二千餘石乙丑上諭樞密院中京商號諸州軍人願畊屯田比括地授之聞徐宿軍謂予田必絕其廩給獨不願受朕意豈肯其令曉之爰諭尚書省聞吏部多繳駁中都納粟官殊不知方闕乏時利害如何又責立功戰陣人保官若輩皆義軍白丁豈識職官朕在都時嘗植恩授規運薪炭入城者以官此豈容僞亦爲所沮自今勿復如是三月庚辰尚書集文資官雜議進士之選詔依泰和例行之癸未訛可敗宋人于光化軍戊子諭宰臣舊制廷試進士日晡後出宮恐能文而

思遲者不得盡其才其今日沒乃出辛卯削陝西行尚書楊貞五官累杖解職壬辰訛可表言官軍自桐栢入宋境所向克捷蒲察五斤奏左監軍哥不孛誣殺防州宣撫副使紇石烈按敦上從尚書省奏按敦徐議郵典使牢籠哥不孛五斤又奏遼東便宜阿里不孫貸糧高麗不應輒以兵掠其境上遣人往諭使知興兵非上國意四月乙巳置河南捕盜使副以濮王府尉完顏毛良虎爲宣差提控以巡督之丙午戶部尚書夾谷必蘭爲翰林學士承旨權遼東行省叅知政事庚戌御史劾集賢院諮議官李維嶽本中山府無極縣進士趙孝選家奴乞正其事上命以官銀五十兩贖放爲良任使仍舊乙卯特賜武舉溫廸罕繳住以下一百四十人及第戊午紅襖賊犯徐邳行樞密院兵大破之癸亥以蝗旱遣重臣審理冤獄并督捕近京河南諸郡

蝗丁卯臨洮路報敗宋人之捷東平行省又奏敗黑旗賊拔膠西縣渠賊李全來援併破之戊辰河北行省敗紅襖賊進至密州降偽將校數十士卒七百悉復其業五月甲戌招撫副使黃榘阿魯荅襲破李全于莒州及日照縣之南三道擊之追奔四十里辛巳策論詞賦經義進士及武舉人入見賜誥命章服山東招撫司奏萊州民曲貴殺節度經略使內族轉奴自稱元帥構宋人據城叛遣官王庭玉黃榘阿魯荅等討平之斬偽統制白珍及牙校數十人生擒偽節度使呂忠及貴等十餘人誅之朝命庭玉保萊朱琛保密阿魯荅保寧海以安輯其民辛卯壽州行樞密院南城軍攻辛城鎮一軍趨史河與宋人戰勝之王辰河北行省復黃縣乙未第鳳翔秦鞏三道南征將士功各遷其官己亥元兵徇錦州元帥劉侁亨死之六月甲辰樞密院奏

大元集兵應州飛狐將分道南下詔陝西河東各路義士土兵蕃漢弓箭手宜亟教閱以備緩急東平單州衝要豫徙其農民糧畜置可守之城脩近城水砦因以為固潼谷遠連商虢宜令兩帥府選官按視阨塞壬子紅襖賊犯沂州官軍敗之追至白里港都提控齊信沒於陣丙辰遣監察御史粘割梭失往河中絳解等郡同守土官商度可保城池丁巳久旱上諭宰臣治京獄寃囚有小民納石炭過請官錢論死欲從寬宥高琪不可遂止時軍前授官多有濫冒御史言戶部員外郎臧伯昇供億息州偶遇官軍戰勝冒遷一官乞論其罪上以勢連帥府多故之秋豈為一官遂忘大計但令今後釐正七月辛未詔賞南征將士夏人犯龕谷提控夾谷瑞及其副趙防擊走之己卯遣官望祀嶽鎮海瀆于北郊分享太廟社稷祭九宮貴神于東郊以禱

雨遣太子太保阿不罕德剛禮書楊雲翼分道審理冤獄癸未  
大雨太子率親王百官表請御殿復膳庚寅擇明幹官提控銓  
選無違失者與升擢令譯史不任事者驗已歷俸月放滿別選  
能者甲午夏人復犯龕谷瑞又大破之丁酉用點檢承玄言遣  
官詣諸道選寄居守闕丁憂官及親軍入仕才堪總兵者得一  
百六人付樞密任使八月戊申勅親軍百戶以下授職待闕者  
給本俸仍充役俟當赴任遣之己酉詔河北行省完顏霆進軍  
援山東招撫使田琢自今將士立功聽先賞以聞元遣木華里  
等帥步騎數萬自太和嶺徇河東乙卯元兵收代州辛酉棣州  
提控紇石烈醜漢討賊張聚大破其衆復濱棣二州姦人李宜  
伏誅復禁北歸民渡河戊辰元兵收隰州九月乙亥下太原府  
丙戌諭皇太子軍務之速動關機會悉從中覆則或稽緩自今

有當亟行者先行後聞戊子置秦關等處九守禦使命完顏蒲  
察等分戍諸阨元兵徇汾州節度使兀顏訛出虎死之庚寅李  
全破密州執招撫副使黃擱阿魯答節度同知夾谷寺家奴辛  
卯元兵下孝義縣乙未設隨處行六部官以京府節鎮長官充  
侍郎郎中員外主事勾當官聽所屬任使州府官並充勸農使  
餘充副使丙申李全破壽光縣十月甲辰又破鄒平縣戊申破  
臨朐縣己酉元兵徇絳潞壬子攻平陽提控郭用死之癸丑下  
平陽甲寅詔諸部錄囚官凡坐軍期者皆奏讞權平定州刺史  
范鐸坐棄城伏誅丙辰宋人攻漣水縣提控劉瑛敗之丁巳元  
兵攻澤戊午從尚書省言獲姦細叛亡率多僧道詔沿邊諸州  
准本處受度聽依舊居止來自河北山東遣入內郡譏其出入  
予子詔河東北路忻代寧化東勝諸州並受嵐州帥府節制十

一月庚午大赦庚辰御登賢門召致政舊臣尚書完顏蒲刺都  
蕭貢僕散偉奧屯札里吉學士完顏孛迭轉運使福僧趙重福  
節度使猪奮石抹仲溫李元輔中尉完顏奴婢刺史紇石烈吉  
咸賜酒食訪問時政得失辛巳以權右都監訛可行元帥府事  
于息州甲申詔河東南路隰吉等州聽絳州元帥府節制升絳  
州爲晉安府總管河東南路兵降平陽爲散府元兵收潞州納  
合蒲刺都參議官脩注王良臣死之戊子龔谷提控夾谷瑞敗  
夏人丁質孤堡巳丑河北行省報海州之捷壬辰定經兵州縣  
職官子孫非本貫理蔭及過期不蔭等格丙申元兵下太原之  
韓村紫十二月乙巳命徒單思忠祈雪得之甲寅命開封府治  
中呂子羽等使宋講和至淮宋人不納而還徐州奏紅襖賊攻  
城胡村寨州兵擊敗之乙卯以禮部侍郎抹撚胡魯刺爲汾

湯軍節度使權元帥石監軍嵐州元帥古里甲完復河東給空  
名宣勅及金銀符許便宜遷注以招脅從丁巳籍瀕河埽兵癸  
亥詔伐宋命皇太子撫軍胥鼎言樞密掌天下兵凡事已屬東  
宮又設諸道行院樞密但奉行文書而已自今軍中號令關賞  
罰者皆明注詔旨毋容軍司得售姦欺從之止憂南征帥不得  
其人與太子謀天下之廣緩惡無可倚嘆息而罷

講和彼既不從安得不川兵也時元兵已定大軍可也  
料集百官議備禦民久之計青鼎上言沿邊州府皆  
及守禦邊隘者能行暴露備邊艱險一體城定資  
激勵其近制軍前立功犯罪之人行究帥府不得亂行

弘簡錄卷二百十九

明刑部員外郎仁和弘齋邵經邦學

皇清翰林院侍講學士四世孫遠平校閱

載記 金主八之下

宣宗興定三年正月丙子定鎮成征行官減資歷月日格戊寅  
議行均輸稅民種地畝勅和市邊城軍需無至配民壬午大雪  
命停葺器物庫廡舍丁夫免單丁民戶月輸軍需錢丙戌紇石  
烈牙吾塔伐宋奏捷上語侍臣此事朕豈得已近日遣使實欲  
講和彼既不從安得不用兵也時元兵已定太原河北事勢難  
料集百官議備禦長久之計胥鼎上言沿邊州府官至于掌兵  
及守禦邊隘者征行暴露備歷艱險一體減定資歷年月以示  
激勸其近制軍前立功犯罪之人行院帥府不得輒行誅賞此

見朝廷至意賞由中出示恩有歸可從至於部分失律主將不得卽治其罪則將權太輕下無所畏而令莫得行矣上以問樞密對如鼎言乃詔自今四品以下皆得專決丁酉鄧州帥府提控婁室有罪滅死削爵二月丙午上語宰臣江淮之人號稱悞弱自官軍攻蔓菁嶋其衆困甚脅之無一肯降我家河朔州郡一遇北警往往出降誠爲可嘆已酉白撒已得鳳州取武休關將遂取蜀詔尚書省議朕意殊不然假令得之亦何可守此舉蓋爲宋人渝盟初豈貪其土地邪朕重惜生靈惟和議早成爲佳爾已未諸將奏捷僕散安貞入宋境破梁縣等軍擒統制李申之完顏賽不牙吾塔破白石關平山砦陝西兵破虎頭關取興元洋州上聞大悅三月庚午又破宋人于七口倉甲戌高麗表言先請朝貢今道路不通請俟平定後議通欵命行省姑示

勦縻勿絕其好已卯提控奧屯吾里不敗宋人于上津縣軍還至濠州宋人來拒牙吾塔擊走之丙戌安貞破宋人于石埭山辛卯又破之于塗山壬辰賽不敗之于老口鎮又敗之于石鵲崖時太原等路州縣各闕正官令民推其所愛爲長從行省量與職任及運解鹽入陝西以濟調度命胥鼎兼領其事其朝廷已授者別議任使閏月壬寅叛賊王公喜構宋人取沂州丁未諭樞密院議晉安東平河中諸郡備兵之策辛亥少府少監粘割梭失言利害七事甲寅以南伐師還罷南邊州郡籍民爲兵戊午夏人破葭州之通秦砦刺史紇石烈王家奴戰沒壬戌治書侍御史蒲魯虎上書請選太子師傅甲子賞南伐功胥鼎等各遷官四月丙寅朔裕宿等州置元帥府選陝西步騎精銳六千人實京兆戊辰選精銳六萬分屯平涼涇邠乾耀等州庚午

以秦州防禦使女奚烈古里間行元帥府于平涼罷募民運解  
鹽築京師裏城命侯摯董役高琪總監之募人能致甓五十萬  
者遷一官百萬仍升一等平陽判官完顏河刺左廂譏察霍定  
和發宋蔡京故居得二百萬有奇准格遷賞甲戌以知臨洮府  
事石蓋合喜爲鞏州行元帥府左都監癸未陝西黑風晝起有  
聲如雷地大震乙酉夏人據通秦寨提控納合買住擊敗之已  
丑論林州都統霍成以疑貳誣殺降人當死元帥惟良不欲因  
敵人誅邊將請寬其罰仍請立護送降民賞格護送十人以上  
至者遷一官五十人以上兩官百人以上兩官雜班任使不及  
者每名賞錢二百緡詔從之庚寅高汝礪請備防秋糧宜及年  
豐於河南州郡驗直立式募民入粟上與議定其法而行之五  
月乙未朔鳳翔元帥府遣兵敗宋人于黃牛等堡六月甲子朔

暑給脩城夫病者藥餌甲戌李全寇日照博興紇石烈萬奴  
敗之寇卽墨完顏僧壽又敗之遂復萊州戊寅曲赦河東南北  
路詔陝西簽軍如河南例丁亥命防禦使徒單福定等帥所部  
義軍與沂州民老幼盡徙于邳戊子遼州總領提控唐括狗兒  
帥師復太原府詔右司諫郭著撫諭其軍民七月丁酉籍邳海  
等州義軍脅從歸國人給地三十畝有力者五十畝仍蠲差稅  
充軍者日支糧二升號決勝軍時裏城功未畢尚書欲增調民  
上慮妨農并糧儲不繼諭樞臣言是役之興實爲大計今功已  
過半偶值霖潦成功差遲所議增丁夫勢必驗日不令妨業比  
及防秋當告成矣卿等善爲計畫無貽朕憂庚子平涼等處地  
震遣徒單思忠祭地祇于上清宮曲赦陝西山東西路甲辰置  
京東西南三路行三司勸民種麥無種粒者貸之八月戊辰遣



禮書楊雲翼祭社稷侍讀學士趙秉文祭后土于河中府時處  
分尚書事或至數日不奉行上謂大臣容有遺忘左右司玩弛  
臺臣當糾乃定御史上下半月勾檢省中制勅文字今後復爾  
併罪卿等壬申元兵下武州軍事判官郭秀死之丁丑緩在京  
差徭中山治中王善殺權知府事李仲等以反庚辰元兵下合  
河縣縣令喬天翼等死之乙酉命樞密遣官簡嶺外諸軍之武  
健者養之彰德邢洛衛潞懷孟等城弱者罷遣九月甲午詔單  
州經略使完顏仲屯宿州與右都監紇石烈德同行帥府事丙  
申唐州從宜夾谷天成敗宋人于桐栢丁酉尚書省請中命侯  
摯廣營積貯上曰徵歛已多今更規畫不過強取於民防秋稍  
緩當量減戍兵川度幸足何至是耶不許十月乙丑平涼府先  
地震被命醮祭方行事慶雲見以圖來上遣官覆驗得寶遣

告太廟百官奉表稱賀詔中外已卯元兵次單州境詔諸路民  
應遷避兵而不欲者亟遣人以利害曉之癸未襄城畢工百官  
稱賀宴宰臣便殿仍建碑于會朝門遷摯一官賜琪汝礪思忠  
金鼎各一重幣三丁亥元兵屯綿土壬辰命有司葺闕舍給薪  
米以濟貧民期明年二月罷俟時平則贍之以爲常十一月癸  
巳朔前嵐州舍使張祐自夏國來歸己亥元兵徇彰德府辛丑  
詔朝官七品外路六品以上官歲舉縣令一人上聞戶部令史  
蘇唐催封丘租期限迫促民有刈生禾來輸者遣吏按問杖唐  
五十縣令高希隆減二等甲寅徐州總領納合六哥大破紅襖  
賊于狄山禮部郎中抹撚胡魯刺上疏言時事丁巳高琪下獄  
泰安軍副使張天翼爲賊張林所執以歸宋繫之楚州至是逃  
歸授睢州刺史戊午元兵平晉安府十二月誅琪

四年正月壬辰朔詔免朝丁酉元兵下好義堡庚戌宋步騎十萬圍鄆州聞援軍至夜焚營去招撫副使木虎移刺荅追及之奪其俘還壬子晝晦有頃大雷電雨以風癸丑戶部侍郎張師魯上書請遣騎兵數千及春淮蜀並進以撓宋三月癸卯長春節免朝乙巳林州元帥惟良擒叛人單仲李俊誅之降其黨盧廣已酉南京兵馬使木平賽也行懷孟帥府事壬子經略使完顏陳兒擊敗紅襖賊于忙兒復取海州四月癸亥安武軍節度使柴茂破紅襖賊于棗強邠州經略使段增順破叛賊甄全于唐縣夏人犯邊元帥石蓋合喜破之戊辰禘于太廟元遣趙端攻孟州提控魯德王安復大名府庚辰東平帥府總領提控蒲察山兒破紅襖賊于聊城五月癸巳紅襖賊寇樂陵監山橫海節度使王福連擊敗之張聚來寇又敗之甲午上擊鞠于臨武

殿癸卯元兵徇隰州丙辰徇兗州泰定軍節度使完顏畏可死之六月京畿不雨勅有司閱獄雜犯以下釋之丁丑元遣楊在攻下大名又攻開州及東明長垣等縣己卯祈雨庚辰宋方子忻來歸命有司若不善視或復逃歸漏泄機事其增廢優遇處之鄭州七月辛卯雨宋人及紅襖賊犯河朔諸郡皆降獨滄州經略使王福固守會益都賊張林來攻福乃叛降林帥府請討之癸丑林州行元帥府遣總領嚴祿等討紅襖賊于彰德府生擒僞安撫使王九甲寅遣烏古論仲端等使于元八月戊午朔嚴實戍江王贊據濟南山東招撫高居實遣人招嚴實于青崖砦獲其款以聞李全犯東平府監軍王庭玉敗之擒其僞安化軍節度使張林庚申上諭樞密頴州民渡淮爲宋軍者九十村可追索主者懲一二以誠其餘庚午夏人陷會州刺史烏古論

世顯降甲戌陝西行省報龕谷敗夏人之捷乙亥上諭宰臣河南水災唐鄧尤甚悉除其租餘順成之方止賁正供蠲免和糴雜徵折輸桑皮故紙流民佃荒田者如上優免丙子陝西行省與夏人議和戊寅定選補親軍法造官于河南陝西選之己卯罷葭州招撫司丙戌徙隨路諸軍戶于河南京東西南路各設檢察使副九月辛卯進章宗實錄戊戌元本華里屯軍真定置總領元帥府于歸德以壽州陳留兩鎮兵屬之壬寅宋人屯皂郊堡行軍提控完顏益都擊敗之元遣塔忽等來癸卯夏人來侵甲辰滕州招捕提控夏義勇討紅襖賊敗之己酉夏人陷西寧州尚書省都事僕散奴失不坐誅駙馬都尉徒單壽春奪官一階杖六十甲寅宋人出秦州及夏人來侵丙辰鞏州行元帥府事石盞合喜報定西州之捷十月壬戌元遣蒙官塔忽訛甲

刺等來己卯陝西東路行省報綏德州之捷紅襖賊一月四寇泗州掠人畜而去癸未京西山寨各設守禦使副令本路帥府總之諭陝西行省圖復會州十一月戊子黃陵峒經畧使烏古論石虎等以戰陣失律伏誅甲午河南水遣官勸課更浮山縣名忠孝乙巳詔柴茂權真定行元帥府左都監蓋仁貴攝右都監元本華里國王引兵圍東平十二月甲戌祈雪禮部郎中權左司諫抹撚胡魯刺上封事庚戌臘享于太廟乙酉鎮南軍節度使溫迪罕思敬上書言錢幣稅賦二事甲寅詔諸道五年正月丙戌朔免朝壬辰議禦西夏及征南事諭皇太子以東平禦敵方畧甲午諭樞密院南伐事當詳議其便丁酉元兵攻天井關戊戌宋人襲泗州西城提控王祿死之乙巳詔諸道共集蔡州庚戌山東行省報東平之捷二月丙辰朔置招撫司

于單州曲赦東平府庚申下詔伐宋以內族惟弼權中京行院  
同簽樞密事幹勒合打權蔡息行元帥府右都監納合降福權  
宿州行院簽樞密事字木魯達阿權唐鄧行元帥府右都監完  
顏訛論副右都監戊辰罷懷州行元帥府復置招撫司與孟州  
經畧司並受中京行樞密院節制癸未以旱災詔中外赦河南  
路三月丙戌朔上御仁安殿祈雨仍望祭于北郊庚寅宋人圍  
唐鄧完顏訛論力戰却之前鄧州千戶字木魯毛良虎自拔歸  
國訛論以便宜遷三官授唐州同知乙未罷河南路行三司內  
中進徒單思忠尚書右丞兼脩國史以太子詹事僕散毅夫參  
知政事上以近侍局多不留心采訪外事命宰臣照章宗時秩  
滿以所采事定升降預爲攷覈之法以激勸之己亥叛民竄趙  
見招夏人入據來羗城字木魯合往誘以重賞脅從人爲內應

督兵急攻城拔之庚子賜林州行元帥府經歷官康瑒進士及  
第丙午築壇祀雷雨師壬子雨五月戊戌宋人據楚丘官軍復  
之庚子納蘭記僧伏誅告人趙銳升職四等七月己亥義勇軍  
叛據碭山縣詔增給徐州清口等處戍兵衣糧辛亥單州招撫  
劉瓊乞移河南糧濟其軍詔給之八月壬子朔罷黃陵州招撫  
司上諭尚書省碭山叛軍家屬囚歸德旬餘不給糧恐傷其生  
又諭樞密河北艱食民欲南來者日益多速令渡之毋致殍死  
癸亥林懷帥府邀擊紅襖賊于伏恩村敗之甲子詔南征潰軍  
復歸而能力戰者依出界立功格給賞乙丑宋人掠沈丘殺縣  
令九月甲申京東歲饑多盜遣御史大夫紇石烈胡失門爲宣  
慰使往撫安之丁亥詔州府及軍官捕盜慢職四品以下宣慰  
使決之三品以上奏裁戊子增授隰州招撫使軒成官改授西

省節制上月癸丑命僕散毅夫行尚書省于京東督諸軍芻糧  
 乙卯太醫侯濟張子英治皇孫疾不療罪當死上不忍命杖七  
 十除名戊午遣親軍討河南羣盜辛酉元兵攻綏德州丁卯夏  
 人犯定西積石之境戊寅分京畿戍卒萬二千河中民兵八千  
 將以許州元帥紇石烈鶴壽屯潼關西十一月癸未陝西東路  
 行省報安塞堡敗夏人之捷太子親王百官表賀却之甲申諭  
 太府減損食品庚寅募民興南陽水田乙未夏人復攻龕谷宋  
 人攻蘄縣紅襖賊掠宿州辛丑詔蠲徐邳宿泗等州逋租歸德  
 毫壽穎停閣逋戶租外仍蠲三之一逋戶田廬有司募民承業  
 禁其毀損以俟來復有能墾闢田除其科稅蒲城縣民李交  
 秀等謀反伏誅壬寅宋人焚潁州執防禦判官而去元兵攻延  
 安元帥合達買住及其將士擊敗之加賜賞賚仍下詔獎諭十

二月辛亥朔元兵下潼關詔省院議禦備壬子罷辟舉縣令法  
 丁巳禮部侍郎烏古孫仲端翰林待制安庭珍使北還各遷一  
 階庚申罷河南義軍丁卯罷新募民軍減樞密院掌兵官及京  
 城戍兵仍諭行院帥府毋擅增設簽補辛未罷行總管府及招  
 討統軍檢察等同定宋人來歸賞格及詐誘征防軍人逃亡罪  
 法閏月辛巳朔元兵徇鄜州乙酉提控木甲咬住破沈丘賊于  
 陳瓦丙戌頒詔撫諭河南土寇定招捕官賞格己丑孫瑀及捕  
 盜官吾古出招降秦和縣賊二千詔斬其首惡餘皆釋之保靜  
 軍節度同知郭澍以徵糧失期誣殺平民坐誅辛卯官軍復葭  
 州癸巳通遠軍節度使孛術魯合住削官丙申紅襖賊夜入蒙  
 城縣大掠而去縣官失其符印軍民死者甚衆己亥發兵捕京  
 東盜并撫諭百姓壬寅發上林署粟賑貧民陳亳等州鹿邑城

父諸縣盜蠡起趣樞府遣官討之捕盜軍所過殘民遣御史往  
按視軍所獲牛有司以官錢收贖已酉更造典定寶泉每一貫  
當通寶四百貫  
元光元年正月庚戌朔免朝辛亥元帥惟弼破紅襖賊于張騫  
店壬午遣官墾種京東西南三路水田甲寅詔陝西西路行省  
徙京兆者兵退還治平涼防州刺史把移失利以棄城伏誅鄭  
州防禦使裴滿羊哥同知古里甲石倫除名西面節度使把古  
乃住奪官壬辰詔徙中京唐鄧商虢許陝等州屯軍及諸軍家  
屬赴京兆同華就糧二月乙酉陝西西路行省請以厚賞募河  
西諸蕃部族寺僧圖復大通城命行省樞密院籌之癸巳上諭  
宰臣宋人攻平輿襄信我師力戰却之事狀已詳其遣清望官  
齋空名宣勅覈實給之庶見朝廷急於勸獎俟帥府上功然

後推賞乙未元兵屯葭州甲辰上念鄜延被兵嘗發民粟給軍  
詔除延安鄜坊丹葭綏德稅租仍令有司償其粟直不足者許  
補官戊申恆州軍變萬戶呼延棧等下餘人殺掠城中焚廬舍  
而去已酉遣行元帥府事訛河節制三路軍馬伐宋同簽行樞  
密院時全副之三月辛酉宋人掠確山縣之劉村戊辰樞密院  
委差官賈天安上書言利害壬申御史劾徒單思忠以病馬輪  
官冒取高價論監主自盜上顧惜大體降授陳州防禦使癸酉  
提控李師林敗夏人于永木嶺郭文振表近得俘者言南北合  
兵將攻河南陝西詔樞密備禦四月辛巳置大司農司設大司  
農卿少卿丞京東西南三路陝西並置行司兼採訪公事設捕  
盜方畧壬午元兵攻陵川縣丁酉削林懷路行元帥府事惟良  
官兩階罷之戊戌更定辟舉縣令之法命復行之制諸監官及

八品以下職事試補侍衛親軍籍丁憂待闕追殿等官以備訪  
秋名致政胥鼎等赴省議利害丁未行樞密院報淮南之捷五  
月戊申朔元兵屯隰吉翼等州六月戊寅朔陳州防禦使呂子  
羽坐乏軍興自盡造舟運陝西糧由大慶關渡抵湖城癸未大  
赦丁酉紅襖賊掠柳子鎮驅百姓及驛馬而去提控張瑀追擊  
奪所掠還偽監軍王二據黎陽縣提控王泉討之復其城七月  
庚戌元將按察兒屯晉安冀州之境己未歸德行樞密院王庭  
玉報曹州破紅襖賊之捷庚申定監當官選法河北羣盜犯封  
丘開封界令樞密院禦捕戊辰紅襖賊襲徐州之十八里砦又  
襲占城砦園官軍破之乙亥太白晝見經天與日爭光八月丁  
丑定西征將士官賞有差己卯彗星見西方大赦改元上諭宰  
臣赦書已頒時刻之間人命所係其令將命者速往刻期而塗

甲申增定藏匿逃亡親軍罪及告捕賞格嶺石州蕃族叛附于  
夏鞏州提控尼龐古三郎討之獲羊千口進尚膳詔却之壬寅  
祈雨九月丙午朔諭陝西行省備邊乙卯議經畧淮南己巳宋  
人掠遂平縣之石砦店復侵南陽唐州提控夾谷九佳敗之十  
月丁丑夏人掠德順之神林堡壬午宋張惠攻零子鎮為幹魯  
朶所敗鹵其裨將二人河中府萬戶孫仲威執其安撫使阿不  
罕胡魯刺據城叛陝西行省遣將討平之癸未復曹州甲申上  
獵于近郊詔免百官送迎并有姓治道庚寅徙彰德招撫使杜  
先軍於衛州乙未元兵下滎州之胡壁堡及臨晉十一月丁未  
元兵徇同州戊辰元蒙古蒲花攻鳳翔府十二月乙亥朔上語  
皇太子吾嘗夜思天下事必索燭以記明而即戮汝亦當然丁  
亥疊州總管青宜可卒特命其子角襲職戊子詔復置近侍局

說書官諭以奉御奉職皆少年不知書朕憶曩時日爲講論自古君臣父子之教使知所以事上者己丑蘭州提控唐括昉敗夏人于質孤堡元大軍攻鳳翔二年正月甲辰詔免朝賀乙巳元兵下河中府壬子奪壽州防禦使完顏乃刺官四階時宰臣遇有人言便宜事屢奏乞作中旨行之上曰帝王從諫足稱聖治豈可掠美以爲己出不聽戊午李膺驢以罪罷宰臣請驕以散地上曰此輩豪傑正須誠待若以術制適使自疑但不畀軍政外補何害乃授恆州刺史時鬻爵恩例有起復丁憂官之令上謂教人以不孝亦不許二月壬午詔尚書省議軍官犯罪舊制更不任用今多故之秋人才難得除大罪外徒刑追配有武藝善掌兵者量才復用丁亥大赦己亥鳳翔圍解三月甲辰朔宋人襲汝陽辛酉禁茶壬戌

詔以鳳翔戰功及頒賞等級徧諭諸郡辛未詔職官犯罪非死罪除名遇赦幸免有才幹者中外並用四月癸酉朔復霍州汾西縣詔給空名宣勅遷賞將士之有功者丙子設京兆南山安撫司丁丑贈死節鳳翔萬戶完顏醜和懷遠大將軍其父恕除以功例賞外遷兩官升職二等己卯遣官閱河南帥府見兵籍簽寄居官民及閑宮豪右親丁并遼東河北客戶爲軍五月癸卯朔始造元光重寶及元光珍貨同銀行用丙午復河中府及滎州遣人持檄招前恆山公武仙及東平嚴實己未參政毅夫言脅從人號忠孝軍置汾淮者所爲多不法請防閑之上曰人心惟傾叙之何如若果有術遠方猶且聽命不然雖左右亦難防閑正在廓開大度而已若是而不能致太平者命也六月乙亥京東總帥報淮南之捷戊子議遣人招李全張林甲午詔罷



河中行省置元帥府七月壬寅朔夏人犯積石州羗界寺族多陷沒惟桑通寺僧看通昭通斯沒及答那寺僧奔鞠等拒而不從詔賞諸僧鈐轄正將等官給以廩祿乙巳遣兵守衛解州鹽池庚戌以空名宣勅遷賞諸部降人壬子除市易用銀及銀與寶泉私相交易之禁癸丑勅諸御史比聞朝官及承應人月給俸糧多雜糠上出納斗斛小大不一此皆理所不容而臺官初不問事事須朕言之安用汝曹也乙卯丹鳳門壞丁巳陰坡族之骨鞠門等叛歸夏夾谷瑞發兵討之以捷聞戊午宰臣方對有司奏前奉御濫敦太平卒上大駭曰朕屢欲授太平一職每以事阻憶昔海陵時有二護衛私語一曰富貴在天一曰由君所賜輒授言由君所賜者以五品職意謂誠由已也而其人以疾卒章宗將拜平章張萬公丞相亦遂不起凡此皆命也八月

壬申詔賞京兆路官軍保全南山諸谷之功各以人數多寡爲等第千人以上官一階三千人以上兩階五千人以上三階仍升職一等能以力戰護之者又增一階戰沒者就以贈之甲戌祁州經畧使納合六哥叛遣官招納拒命詔牙吾塔會行院兵討之能捕獲者除見定官外仍與世襲謀克丙戌遣官分行蔡息陳毫唐鄧裕諸州凡民丁相聚立砦避兵與各巡檢軍相依者五千戶以上置砦長一員五百戶增副一員能安民弭盜勸農者論功注授九月庚子朔宋人入壽州女奚烈蒲乃力戰却之壬寅樞密院奏提控木甲剽只罕破宋人之功甲辰宋人攻南陽官軍與戰于胡陂奮力却之提控木虎春兒爲所殺贈以銀青榮祿大夫丙午牙吾塔報桃園淮陽之捷戊申降人孫那佐自李全軍中歸遙授知東平府兼山東西路兵馬都總管癸

丑叛將六哥所署僞都統烏古論賽漢夾谷留住等來歸丙寅  
扎也胡魯等拔邳州南城十月乙亥制行樞密院及元帥府農  
隙之月分番巡徼校獵月不過三次丁丑上獵于近郊己卯禘  
于太廟辛卯詔石壕店沔池永寧縣各屯兵千人壬辰滕州人  
時明謀反伏誅戊戌唐鄧行元帥報淮南之捷十一月辛丑牙  
吾塔報邳州之捷函叛人六哥首以獻丙午邳州紅襖賊三千  
來降朝議置諸陳許之間上恐家屬尚在河朔餘黨必殺之所  
得者寡被害者衆亦復安忍命使撫諭加以官賞遣還果志於  
我雖處河朔豈應負我且餘衆感恩將有效順者矣戊午論上  
黨公完顏開及文振史詠王遇張道虛芝等各與所鄰帥府相  
視可耕土田及灑河北岸之地分界而種之以給軍餉給以空  
名宣命金銀符賞功辛酉鞏州行元帥府報會州破夏人之捷

十二月己巳朔徙汾淮巡檢邊軍于內地辛巳詔延安土人充  
司縣官義軍使者選人代之量免其民差稅邳州民丁死戰陣  
者各贈官一階歸德徐邳宿遷永亳穎壽等州復業及新地民  
免差稅二年見戶一年嘗供給邳州者復免一年之半睢州陳  
留杞縣免三之一丁亥帝不豫免朔戍子皇太子率百官及王  
妃公主入問起居庚寅崩于寧德殿壽六十一壬辰宣遺詔赦  
中外諡曰繼天興統述道勤仁英武聖孝皇帝廟號宣宗正大  
元年三月庚申葬德陵帝當金源末運雖乏撥亂反正之材  
而有勵精圖治之志迹其勤政憂民中興之業蓋可期也然而  
性本猜忌崇信誓御獎用吏胥苛刻成風舉措失當懷巨惡援  
立之私緩趙鞅晉陽之責既不能罪高琪而遂相之方且狃於  
餘威牽制羣議南開宋衅西啓夏侮兵力旣分功不補患曾未

數年遂至再遷失國豈不重可歎哉

載記 金主之九

哀宗皇帝本名寧甲速宜宗第三子母王皇后以承安三年八月二十三日生於翼耶賜名守禮泰和中授金紫光祿大夫宣宗登極進封遂王授祕書監殿前都點檢改樞密使立爲皇太子仍捺制樞密院事改名守緒上病喉痺危篤暮夜近臣皆出惟前朝資明夫人鄭氏年老侍側帝知其可託語以速召皇太子主後事言絕而崩夫人祕之俄頃皇后及貴妃麗氏聞安寢閭麗素陰狡機慧帝意其子英王守純年長不得立心懷軼望恐乘機爲變卽給之口上方更衣且少休他室伺其入遽鎖之悉召大臣迎呈太子始啓戶出后妃發喪時英王已先在內皇太子始至知之分遣樞密院及東宮親衛總領移剌濟阿集軍

三萬屯于東華門街部署既定命護衛四人監守純於近侍乃於樞前卽皇帝位詔畧曰朕述先帝之遺意有便於時欲行而未及者悉奉而行之國家已有定制有司往往以情破法使人罔遭刑憲今後律有本條而不遵者坐以故入人罪草澤士庶許令直言軍國利害雖涉譏諷無可采取者並不坐罪宋自宣宗遷汴後以本朝不足慮絕不往來至是羣臣建言可因國喪遣使報哀副以遺留物因與講解盡撤邊備共守武休之險下省院以皆言朝廷若先遣人恐於國體有虧遂不遣

正大元年正月戊戌朔改元庚子上居廬百官始奏事以左司政事權叅政石盞尉忻爲尚書右丞太常卿李蹊爲翰林承旨權叅知政事甲辰賜策論進士李木論長河以下十人經義進士張介以下五人及第戊申賜詞賦進士王鶚以下五十人及

第詔刑部登聞檢鼓院母鎖閉防護聽有寃者陳訴六月辛卯  
立妃徒單氏爲皇后遣樞密判官移刺蒲阿率兵至光州榜諭  
宋界軍民更不南伐七月己亥詔諭百官各勤乃職癸卯補脩  
大樂十月戊午夏國遣使來脩好十二月甲寅改定辟舉縣令  
法課以六事左丞張行信上言先帝詔書國內刑不上大夫治  
以廉恥高琪所定職官犯罪的決百餘條乞改依舊制詔畧施  
行之二年正月甲申有黃黑之祲四月甲午京畿旱遣使慮  
囚鈞與許州大雨雹丁酉鄭州雨傷麥五月丁丑旱甚責已避  
殿減膳赦罪七月都水蒲察毛花輦殺人免死除名八月鞏州  
元帥田瑞反母弟十哥殺之出降以爲涇州節度使世襲猛安  
九月與夏國議和事金以兄國書稱弟各用本國年號遣使來  
聘十月新軍政改總領爲都尉癸亥遣禮部尚書興敦長弼大

理卿裴滿欽甫侍御史烏古孫弘毅爲夏國報成使乙亥面諭  
臺諫宋人輕犯邊界我以輕騎襲之冀共懲創通好以息吾民  
夏人從來臣屬我朝今稱弟以和我尚不以爲辱宋果行成尚  
欲用兵乎卿等宜悉朕意十二月丙辰王家奴故殺鮮于主簿  
權貴多救之者上謂國家衰弱之際生靈有幾英王朕兄尚不  
敢妄撻一人朕爲人主亦不敢無罪害物族子恃勢如此吾民  
何賴特命斬之是歲立褒忠廟祀死節士十有三人各塑其像  
仍書子孫姓名于御屏量材官之禁宿泗青口巡邊官兵毋復  
擅殺過淮紅襖軍詔趙秉文楊雲翼作龜鏡萬年錄三年三  
月陝西旱詔尚書省議裁減用度四月辛卯親享太廟鄰國夫  
人車經御路過廟前不下詔繫僕婢于獄杖之辛丑旱遣官禱  
于濟瀆癸卯祈于太廟禁緞扇河南大雨雹己酉遣使慮囚捕

蝗五月己未雨失兵掠壽州境癸亥永州桃園軍失利死者四百人乙丑大雨壬申詔諭夔州趙甫等能以土地來歸當任使之六月辛卯京東大雨雹蝗盡死壬子詔諭高麗及遼東行省葛不雷討反賊萬家奴赦脅從者八月辛卯詔設益政院于內廷以楊雲翼等爲益政院說書官日二人直備顧問十月丁酉夏使來報哀十一月庚申議與宋脩好己巳宋忠義軍夏全自楚州來歸王義深張惠范成進相繼以城降詔封全金源惠臨淄義深東平成進膠西皆郡王辛未改楚州爲平淮府赦諸路從宋及淮楚官吏軍民并其家屬和宋議寢丙子元兵征西夏平中興府召陝西行省及總帥完顏訛可牙吾塔赴汴議兵事詔給銀二十五萬兩諭陝西兩省從其給賞凡從事三品以下官聽以功過賞罰之遣中大夫完顏履信爲弔祭夏國使四

年正月壬戌增築中京城浚汴堤并外濠二月蒲河牙吾塔復平陽執知府李七斤獲馬八千以銀贖兩獲男女分賜官軍者聽自便三月元兵平德順府復下平陽己巳徵夏稅二倍五月丁丑元兵平臨洮府陝西行省進三策上策自將出戰中策幸陝州下策棄秦保潼關俱不從六月戊申朔遣前御史大夫完顏合周爲大元議和使丙辰地震太白入井賜詞賦經義盧亞以下進士及第七月元兵自鳳翔徇京兆關中大震壬辰以中丞烏古孫卜吉祭酒裴滿阿虎帶兼司農卿發民軍勸率富民入保城聚兼督秋稅令百姓知避遷之計丁酉赦陝西東西兩路賜民今年租八月庚戌詔有司罷遣防備丁壯脩城民夫軍須差發應不悉者權停己巳立帝生日爲萬年節同知集賢院史公奕進大定遺訓待制呂造進尚書要畧是日大風落左掖

門鴟尾壞丹鳳門扉隕霜禾盡損李全自益都復入楚州據之  
命招以淮南王爵全言義深成進皆我部曲而受王封何以處  
我竟不至壬戌上獵監察御史進諫怒以邀名責直詔責之十  
一月乙未日曩有白虹二貫于上下西獵近郊十二月元兵下  
商州壬子遣使安撫陝西以牛千頭賜貧民 五年正月丁丑  
親祭三廟庚辰遣知開封府事完顏麻斤出如大元弔慰丙戌  
議擊盱眙二月乙巳朔大寒雷雨雪木之華者盡死三月乙酉  
監察御史烏古論不魯刺劾近侍張文壽張仁壽李麟之受饋  
遺上怒凡四日不視朝御史再言三姦不已始曲赦其罪而中  
之四月辛亥議放還西夏人口丙寅親衛軍王咬兒酗酒殺  
孫大理寺當以徒刑特命斬之六月壬戌旱赦雜犯死罪已下  
八月乙卯遣使禱于上清宮九月庚寅雨足始種麥十一月

已進宣宗實錄十二月庚子朔完顏麻斤出以奉使不職免死  
除名改完顏訥申侍講學士充國信使癸丑以陝西大寒賜軍  
士柴炭銀有差京兆鳳翔府司竹監進竹令分給之 六年二  
月丙辰耀州刺史李興有戰功詔賜玉兔鸚鵡帶金器五月隴州  
防禦使石抹冬兒進黃鸚鵡詔却之七月罷陝西行省軍中浮  
費十月元兵駐慶陽界詔陝西行省遣使奉羊酒幣帛乞緩師  
請和十一月遣使選試陝西歸順人得軍二千以藝優者充忠  
孝軍次充合里合軍十二月詔蒲阿牙吾塔權簽樞密院事與  
訛可救慶陽罷附京獵地聽民耕稼 七年正月慶陽圍解命  
訛可屯邠州蒲阿牙吾塔還京五月詔釋清口宋敗軍三千人  
願留者五百人以屯許州餘悉縱遣之賜經義詞賦李瑋以下  
進士出身有差七月元軍入陝西京兆同華之間破南山砦柵

六十餘所八月賜陝西死事之孤鹽引及絹仍量材任使 入  
年正月元兵圍鳳翔合達蒲阿瞻望逗遛遣密院判官白華右  
司郎中夾谷八里門馳問曰今二月過半有怠歸之形諸軍何  
故不動蒲阿曰彼軍絕無糧餉正使欲戰不得欲留不能將自  
敝矣合達初言不可動再言見機可動則動矣還奏上知其怯  
復遣傳旨鳳翔圍久恐守者力不能支爾等當領軍出關宿華  
陰界略與渭北軍交手大兵聞之必當奔赴且以少紓鳳翔之  
急兩省廻奏領旨華東還仰天浩歎曰事至于此無如之何四  
月丁巳朔赦免京西路軍需錢一年旱災州縣差稅從實減貸  
元兵入鳳翔府兩行省棄京兆遷居民於河南留慶山奴守之  
五月李全妻楊妙真以全陷沒于宋構浮梁楚州北就北帥梭  
魯劄乞師復讐上恐離河南不遠遣合達蒲阿屯桃源界激河

以備侵軼因約宋將趙范趙葵為夾攻之計宋八里莊人拒  
之詔改八里莊為鎮淮府七月宋將焚浮梁九月丙申慈聖宮  
皇太后溫敦氏崩遺詔因陵制度務從儉約元兵駐河中府慶  
山奴棄京兆東還名合達蒲阿赴汴議引兵趨河中府懼不敢  
行還陝州出師至冷水谷而歸元兵攻河中府合達蒲阿遣元  
帥王敢率兵萬人救之十一月丁未元兵由金州進曉峰關報  
至時日已暮省院官入奏北軍冒險萬里經歷二年方入武休  
其勞已極今但以兵屯睢鄭昌武歸德及守洛陽潼關懷孟等  
處京師積糧數多命河南州郡堅壁清野百姓聚保山砦彼欲  
攻不能欲戰不得師老食盡不擊自歸矣上太息曰南渡二十  
年所在之民破田宅鬻妻子以養軍士朕在東宮日立親衛騎  
兵武衛護衛十三都尉每尉眾至萬人疆壯趨捷極為精練忠

孝軍萬八千皆回紇河西中州人被掠逃歸者今敵至不能迎  
戰徒以自保京城雖存何以爲國天下其謂我何朕熟思之存  
亡有天命惟不負民可也乃詔諸將屯軍襄鄧十二月己未河  
中府破合達蒲阿率諸軍入鄧州楊沃衍完顏彝武仙皆引兵  
來會出屯順陽戊辰元兵渡漢江而北丙子畢渡分道趨汴京  
師戒嚴詔脩樓櫓及守禦備

天興元年正月壬午朔日有兩珥元兵道唐州元帥兩婁室與  
戰襄城之汝墳敗績遁走汴京遣完顏麻斤出等部民丁萬人  
決河水衛京城癸未置尚書省樞密院于宮中以便召問乙酉  
以點檢夾谷撒合爲總帥將步騎三萬巡河渡權近侍局使徒  
單長樂監其軍起近京諸邑軍家屬五十萬口入京丙戌元兵  
出河清縣曰坡渡河丁亥長樂撒合引兵至封丘而還戊子斜

亦愛實上書請斬二人以肅軍政不報壬辰衛州節度使完顏  
斜捨阿不棄城走汴甲午元兵薄鄭州與白坡兵合屯軍元帥  
馬伯堅以城降防禦使烏林荅咬往死之乙未元游騎至汴城  
丁酉大雪兩省軍及元兵戰鈞州之三峯山大潰自是兵不復  
振己亥義勝軍校侯進杜正張興率所部北降庚子御端門肆  
赦改元開興辛丑潼關守將李平降壬寅扶溝民錢大亨李鈞  
叛殺縣令王浩及其簿尉庚戌許州軍變殺元帥古里甲石倫  
等以城降二月甲寅元兵徇臨渙攝縣令張若愚死之戊午次  
盧氏大雪關陝行省徒單兀典總帥納合合閏兩軍棄潼關而  
東未戰軍潰咸敗而死完顏重喜降斬于馬前都尉鄭侗殺都  
尉苗英亦降戮其妻子己未元兵下睢州乙丑攻歸德庚午括  
京師民軍二十萬分隸諸帥三月丁亥元軍平中京甲午命平



章自撤宿上清宮樞副合喜宿大佛寺以備緩急元遣使自鄭  
州來諭降使者立出國書以授譯史轉授宰相上起立受之以  
付有司書索翰林學士趙秉文衍聖公孔元措等二十七家及  
歸順人家屬蒲阿妻子繡女工匠鷹人又數十人庚子封荆王  
子訛可爲曹王議以爲質壬寅曹王入辭宴于宮中命左丞李  
蹊送之諫議大夫裴滿阿虎帶太府監國世榮爲講和使戶部  
侍郎楊慥權叅知政事分軍防守四城置局養無家俘民四月  
癸丑兵士李新有功擢四方館使丁巳遣戶部侍郎楊仁奉金  
帛詣軍前乞和戊午又以珍異往謝許和甲子又改元天興詔  
內外官民能完復州郡者遷賞有差出金帛酒炙犒飫軍士減  
御膳罷冗員上書不得稱聖改聖旨爲制旨釋鎬鳩王衛紹王  
二族禁錮聽日使乙丑百官初起居于隆德殿前丙寅以尚書

省兼樞密院事丁卯放宮女聽以衣裝自隨金珠留犒士卒咸  
辰汴京解嚴步軍始出封丘門采薪蔬已已建城都尉完顏兀  
論同元使沒忒入城庚午見使臣於龍德殿辛未開鄭門聽百  
姓男子出入遷民告出者日以萬數甲戌御承天門大饗將士  
聞有聲屈者亟命還宮乙亥有詔止奏事五月乙酉內族思烈  
行鄧州尚書省以名授兵丙戌拜天於大慶殿放京城四面軍  
李辛不奉詔戊子裕州鎮防軍將領賀都喜率西軍二千人入  
援辛卯大寒如冬汴京大疫凡五十日諸門出死者九十餘萬  
人貧不能葬者不在是數辛丑上御香閣面責宰相乙丑將相  
受保城爵賞六月庚戌朔詔百官舉大將劉益上不能用癸丑  
以出師錮門禁飛虎軍二百人奪封丘門出奔丙辰闕官馬殺  
其瘠者以食庚申塞京城四門以便守禦辛未復脩汴城以疫

後園戶僧道醫師鬻棺者擅厚利命有司倍征之以助其用乙亥李蹊送曹王與其子全俱還七月庚辰朔兵刃有火辛巳軍一過登聞鼓乞將劉益癸未右丞顏蓋世魯罷以完顏奴申叅知政事甲申飛虎軍事申福蔡元擅殺北使唐慶等三十餘人于館詔貰其罪和議遂絕丁亥拜天子承天門下出內府及兩宮物賜軍士戊子下令招軍命簽民爲之鞏昌民百二十赴援乙未新軍有撾登聞鼓者杖殺之乙巳金木火太陰會于軫翼丙午思烈武仙及鞏昌總帥完顏忽斜虎率諸將兵自汝州入援命李蹊勸諭石盞合喜出兵一萬八月己酉朔屯杏花營又益以五千兵始進屯中牟故城辛亥斜虎思烈遇元兵于京水大潰中京元帥左監軍任守貞死之合喜棄輜重奔至鄭門聚兵乃入甲寅免爲庶人因籍其家以賜軍士降監軍長樂爲符

寶郎戊午括民間粟己未籍徒單兀典完顏重喜納合合閏家貲戊辰復起侯摯行京都路尚書省事乙亥賣官及許買進士第授入貲京城民楊興延州刺史劉仲溫許州刺史九月戊寅朔詔減親衛軍己丑軍士殺鄭門守者庚辰復起張開王義深范成進爲元帥完顏合周權叅知政事乙未召民賣放下年軍需錢上戶田租如之辛丑夜大雷工部尚書范乃速震死閏月辛亥遣張開溫撒辛劉益高顯率步軍護陳留通許糧道戊午招民爲鄉導己未連有書姦臣姓名者以箭射入宮得之辛酉再括京城粟以御史大夫合周點檢徒單百家等主之十月前司農卿李煥飛語詔繫李蹊并戶部侍郎楊慥于獄以失軍儲坐罪除名慥家貲被籍遂以渙權戶部尚書尋赦殘欠糧其應以糧事繫者皆釋之乙未詔徵諸道兵期以十二月一日入援

十一月丁未朔賜貧民粥已酉衛州軍校白晝取豐備倉米壬子京城人相食癸丑詔曹門宋門放士民出就食壬戌名諸將相入議事丙寅河解元帥權興寶軍節度使趙偉襲據陝州以叛殺行省阿不罕奴十刺以下凡二十一人誣以爲反上知其寃不能直就授偉元帥左監軍兼西安軍節度使行總帥府事尋亦歸北十二月丙子朔以事勢危急甲申詔議親出以賽不白撒訛出李蹊徒單百家等率諸軍扈從完顏奴申習捏阿不裏城四面都總領戶部尚書完顏珠頰外城東面元帥把撒合南面元帥木甲咬住西面元帥孛術魯買奴北面元帥孛術承旨烏古孫卜吉提控諸王府同判大陸親府事內族合周管宮掖事行省左右司郎中烏古孫奴申兼知宮省事御史大夫裴滿河虎帶兼鎮撫軍民京城都彈壓除拜旣定以京城付之擢

前儀封令魏璠爲翰林脩撰如鄧州招武仙入援丁亥上御端門發府庫及兩府器皿宮人衣服賜將士庚子帝服絳紗袍導從如常儀與太后皇后諸妃大慟而別行次公主苑太后遣中官持米肉徧犒軍士辛丑至開陽門外麾留守官及京城父老退詔諭戍兵曰社稷宗廟在此汝等壯士毋以不預進發之數便謂無功若保守無虞將來功賞顧豈在戰士下聞者皆灑泣是日鞏昌元帥完顏忽斜虎至自金昌爲上言京西三百里之間無井竈不可往東行之議遂決以爲尚書右丞從行遂次陳留壬寅次杞縣癸卯次黃城甲辰次黃陵癸巳諸將復請幸河朔從之二年正月丙午朔濟河北風大作後軍不克濟丁未元將回古乃追擊于南岸元帥完顏猪兒賀都喜紇石烈訛論等死之溺死者近千人建威都尉完顏兀論山降于元帝於

北岸望之震懼丁酉上率從官爲猪兒等設祭哭之皆贈以官錄用其子姪斬兀論出二弟以殉赦河朔招集兵糧議取衛州元帥蒲察官奴將忠孝軍千人東面元帥高顯果毅都尉粘哥咬住領軍萬人爲前鋒庚戌上次漚麻岡元帥和速嘉兀底不繼至辛亥白撒引兵攻衛州不克乙卯聞河南大兵濟自張家渡至衛之西南詔班師戊午車駕次蒲城復還魏己未帝夜棄六軍渡河與副元帥合里合六七人走歸德侍衛皆不知巡警如故庚申諸軍知帝已往遂潰辛酉夜四鼓帝狼狽出西門入城赦府囚軍民普覃一官賜進士終場王輔以下十六人出身戊辰崔立舉兵爲亂殺知政事完顏奴申樞密副使完顏斜捨阿不勒兵入見太后官議監國言衛紹王太子梁王承恪其妹公主在北兵中乃遣其黨御史中丞韓鐸以太

后命往召承恪既入宣誥受百官拜舞山呼以天子袞冕后服繼而登殿一相所佩虎符詣元將速不斛納款凡除拜皆以監政事宣徽使與其丞卿爲左丞戶部侍郎張正倫爲右丞都事張節師肅爲左右司郎中省椽元好問員外郎都轉運知事王天祺懷州同知康瑋金爲左右司都事開封判官李禹翼棄官去戶部主事鄭著名不起左副點檢完顏阿散右副點檢溫敦阿里皆死癸酉元將速不斛進兵汴京乙亥遣右宣徽提點近侍局事移刺粘古如徐州相地形察倉庫虛實二月丙子朔括城中糧知歸德府石蓋女魯懽乞盡散衛兵出城就食蔡帥烏古論鎬表請臨幸上遣直學士烏古論蒲鮮以幸蔡之意諭其州人戊辰蒲察官奴以忠孝軍爲亂攻殺馬用女魯懽點檢徒

單長樂從官左丞李蹊已下三百餘人軍將禁衛民庶死者三千奉帝居照碧堂禁諸臣無敢奏對者帝日悲泣曰自古無不亡之國不死之主但恨朕不知用人致爲此奴所困耳時從官久苦饑窘帝聞蔡州城地堅固兵衆糧廣急欲幸之官奴力爭以爲不可憤怒而出號於衆曰敢言南遷者斬四月癸巳崔立以梁王從恪荆王守純及諸宗室男女五百餘人至青城甲午兩宮北遷六月巳卯官奴及其黨阿里合白進皆伏誅上御雙門赦忠孝軍以范陳僧王山兒爲元帥統領之遂決策遷蔡詔蔡息陳穎各以兵來迓壬午中京破辛卯上發歸德留元帥王磐守之壬辰次亳州上黃衣皂笠金兔鶻帶前導青黃二旗黃繖擁後從者二三百人馬五十餘匹而已又南六十里避雨雙清寺中帝見蒿艾滿目無一人跡喟然嘆曰生靈盡矣爲之

動癸巳王義深據靈壁望日寨以叛遣近侍直長女奚烈完出將徐宿兵討之義深敗走漣水入宋巳亥上入蔡州城中僧道父老千人拜伏道左見帝儀衛蕭條莫不感泣帝亦歔歔者久之遣近侍諭以國家涵養汝輩百有餘年今朕無德令爾塗炭汝輩無忘祖宗之德皆泣下呼萬歲辛丑詔徐州行省抹撚兀典赴蔡州以權叅政簽樞密院事七月癸卯朔曲赦蔡州管內雜犯死罪以下官吏軍民普覃兩官經應辦者更遷一官弛門禁通衆貨蔡人便之乙巳完顏藥師爲鎮南軍節度使兼蔡州管內觀察使戊申左右司郎中烏古論蒲鮮兼息州刺史權元帥右都監權總帥婁室同簽樞密院事丁巳護衛蒲鮮石魯負祖宗御容至自汴勅有司奉安于乾元寺丁卯定進馬遷賞格每甲馬一匹或二匹以上遷賞有差自是西山帥臣范真姬汝

作等各以馬進凡得千餘匹以抹撚兀典領之又遣使分詣諸道選兵赴蔡得精銳萬人命工部侍郎木甲咬住監繕器甲踰月告成軍威稍振八月癸酉朔以秦州元帥粘哥完展權陝西行省叅知政事論以蠟書期九月中徵兵與土會于饒豐關欲出宋不意以取興元甲戌青山招撫盧進奏元使王楫諭宋還宋以軍護其行帝爲之懼丁丑閱兵于見山亭癸未元帥楚珩復立壽州於蒙城詔遷賞有差州縣官皆令真授乙酉元名宋兵攻唐州破其城宋駐兵息州南丙戌詔抹撚兀典婁室行省院于息州以兵襲宋人于中渡店斬獲甚衆庚寅初設四隅譏察官乙未萬年節州郡二十餘所以表來賀辛丑設和糴及惠民司官以年老進士二人爲之太醫數人更直給病人藥九月癸卯朔假致仕內族阿虎帶同僉大睦親府事使宋借糧入辭

帝論以宋人負朕實深朕自卽位以來戒飭邊將無犯南界凡遇有請征討者未嘗不切責之向得宋一州隨即付與近淮陰來歸多以金幣爲贖朕不肯受財貨取付之全城秋毫不計清口臨陣生獲人數千悉遣以資糧今乘我做據壽入唐攻鄧朕諒爲謀亦淺大元滅國四十以及西夏夏亡及於我我亡必及於宋唇亡齒寒自然之理若與我連和正所以自爲也旣至論宋不許時諸帥往往擁兵自固戊申魯山帥元志冒險數百里率兵入援且戰且行比至衆千餘幾喪其半上表異之賜以大信牌升爲總帥庚戌重九拜天子節度使驪羣臣陪從成禮上面諭國家自開創涵養汝等百有餘年且先世立功已身被堅執銳積亦有年今當厄運與朕同患可謂忠矣比聞北兵將至正汝等立功報國之秋縱死王事不失爲忠孝之鬼况往者立

功常患不知今朕親臨其可不勉因各賜卮酒餘未竟邏騎馳  
奏敵兵突至將士踴躍請戰分軍防守以總帥李木魯婁室守  
城東面內族承麟副之烏古論鎬守南面元志副之兀林荅胡  
土守西面忠孝軍元帥蔡八兒副之權殿前右點檢王山兒守  
北面元帥紇石烈栢壽副之西安軍節度兼殿前右衛將軍行  
元帥府事女奚烈完出守東南元帥左都監夾谷當哥副之殿  
前右衛將軍權左副都點檢內族斜烈守子城都尉王愛實副  
之辛亥元兵築長壘圍蔡城己未括城中粟禁公私釀酒十月  
戊辰更造天興寶會辛巳縱饑民老稚羸疾者出城甲申給饑  
民船聽採城壕芟芟實以食戊子徵諸道兵辛卯上親閱射于  
子城并義軍戰歿被剝者皆賞以麥有差十一月辛丑朔以左  
副都點檢阿勒根移失刺為宣差鎮撫都彈壓副設彈壓四

副之四隅譏察亦隸焉宋遣其將江海孟珙帥兵萬人獻糧三  
十萬石助元兵攻蔡十二月甲戌上親出撫軍盡籍民丁防守  
括婦人壯健者假男子衣帽運大石丁丑元兵決練江宋兵決  
柴潭入汝水己卯元兵破外城宿州副總帥高刺哥戰歿己丑  
元兵將西城帝語侍臣我為金紫十年太子十年人主十年自  
知無大過惡死無所恨特恨祖宗傳祚百年至我而絕與自古  
荒淫暴亂之君等為亡國因此介介於懷自來亡國之君往往  
為人囚繫或為俘獻或辱於階庭閉之空谷朕志已決必不至  
此是日王愛實戰歿砲軍總帥王銳殺夾谷當哥率三十人降  
元庚寅以御用器皿賞戰士甲午帝微服率兵夜出東城謀遁  
及柵不果而還乙未殺尙廐馬五十疋官馬一百五十疋犒將  
士三年正月壬寅冊柴潭神為護國靈應王甲辰以近侍分

守四城戊申夜帝集百官傳位于元帥承麟因其固讓而朕所以付卿者豈得已哉以肌體肥重不便鞍馬馳突卿平日趨捷有將畧萬一得免金祚不絕此朕志也已酉承麟卽皇帝位百官稱賀禮畢亟出捍敵而南面已立宋幟守者棄門俄頃四面呼聲震天地大軍入城巷戰城中軍不能禦帝自縊于幽蘭軒末帝承麟退保子城聞帝崩率羣臣入臨諡曰哀宗哭奠未畢城潰諸禁近舉火焚之承麟爲亂兵所害金亡 舊史贊曰金之初興天下莫彊焉太祖太宗威制中原以効遼初故事立楚王齊委而去之宋人不競遂失故物熙宗海陵濟以虐政中原缺望大事幾去天厭南北之兵挺生世宗以仁易暴休息斯民金之延祚百有餘年由大定之政有以締結人心故也章宗志存潤色而秕政日多誅求無藝民力寢竭明昌承安盛極衰始

至於衛紹紀綱大壞亡徵已見宣宗南渡棄厥本根外徂餘威連兵宋夏內致困憊自速土崩哀宗之世無足爲者區區生聚圖存於亡力盡乃斃可哀也矣在禮國君死社稷今始見焉



